

欽定魏書

卷之十  
三六一

魏書卷三十六

齊

魏

收

撰

列傳第二十四

李順

李順字德正趙郡平棘人也父系慕容垂散騎侍郎東武城令治有能名太祖定中原以系爲平棘令年老卒於家贈寧朔將軍趙郡太守平棘男順博涉經史有才策知名於世神瑞中中書博士轉中書侍郎始光初從征蠕蠕以籌略之功拜後軍將軍仍賜爵平棘子加奮威將軍世祖將討赫連昌謂崔浩曰朕前北征李順獻

策數事實合經略大謀今欲使摠攝前驅之事卿以爲何如浩對曰順智足周務實如聖旨但臣與之婚姻深知其行然性果於去就不可專委世祖乃止初浩弟娶順妹又以弟子娶順女雖二門婚媾而浩頗輕順順又弗之伏也由是潛相猜忌故浩毀之至統萬大破昌軍順謀功居右轉拜左軍將軍後征統萬遷前將軍授之以兵昌出逆戰順督勒士衆破其左軍及克統萬世祖賜諸將珍寶雜物順固辭唯取書數十卷世祖善之至京論功以順爲給事黃門侍郎賜奴婢十五戶帛千匹又從擊赫連定於平涼三秦平遷散騎常侍進爵爲侯

加征虜將軍遷四部尚書甚見寵待沮渠蒙遜以河西  
內附世祖欲精簡行人崔浩曰蒙遜稱蕃歛著河右若  
俾遐域流通殊荒畢至宜令清德重臣奉詔褒慰尚書  
李順卽其人也世祖曰順納言大臣固不宜先爲此使  
若蒙遜身執玉帛而朝於朕復何以加之浩曰邢貞使  
吳亦魏之太常苟事是宜無嫌於重爾日之行豈吳王  
入覲也世祖從之以順爲太常策拜蒙遜爲太傅涼王  
使還拜使持節都督秦雍梁益四州諸軍事寧西將軍  
開府長安鎮都大將進爵高平公未幾復徵爲四部尚  
書加散騎常侍延和初復使涼州蒙遜遣中兵校郎楊

定歸白順曰年衰多疹舊患發動腰脚不隨不堪拜伏  
比三五日消息小差當相見順曰王之年老朝廷所知  
以王祇執臣禮別有詔旨豈得自安不見上使也蒙遜  
翌日延順入至庭中而蒙遜箕坐隱几無動起之狀順  
正色大言曰不謂此叟無禮乃至於是今則覆亡之不  
恤而敢陵侮天地魂神逝矣何用見之將握節而出蒙  
遜使定歸追順於庭曰太常旣雅恕衰疾傳云朝廷有  
不拜之詔是以敢自安耳若太常曰爾拜爾跽而不祇  
命斯乃小臣之罪矣順益怒曰齊桓公九合諸侯一匡  
天下周王賜胙命曰伯舅無下拜而桓公奉遵臣節降

而拜受今君雖功高勲厚未若小白之勤朝廷雖相崇重未有不拜之詔如便偃蹇自大此乃速禍之道非圖久安之計若朝廷震怒遂相吞滅悔何及哉蒙遜曰太常規之以古烈懼之以天威敢不翹棟敬聽休命遂拜伏盡禮禮畢蒙遜曰夫恃德者昌恃力者亡朝廷頃來征伐屢克境宇已博但當循理此民亦足興治然專務討擊恐不可常勝順曰昔太祖廓定洪基造有區夏太宗承統王業惟新自聖上臨御志寧四海是以戎車屢駕親冒風霜滅赫連於三秦走蠕蠕於漠北闢土開邊隸首不紀僵屍截馘所在成觀除蕩暴虐存恤黎庶威

震八荒聲被九域自古以來用兵之美未有今日之盛  
是以遐方荒俗之氓莫不翹足抗手歛衽屈膝天兵四  
臨昭德罰罪何云恃力夫聖王之用兵也征南蠻則北  
狄怨討西戎則東夷恨天子安得已哉蒙遜曰誠如來  
言則涼土之民亦願魏帝遠至何爲復遽驛告警不舍  
晝夜意君之所言殆爲虛事順曰苗民叛帝舜而親暴  
君有扈違后啓而從逆主咸懾逼於近地牽制於凶威  
自古而然豈獨涼民也順旣使還世祖問與蒙遜復往  
之辭及蒙遜政教得失順曰蒙遜專威河右三十許年  
經涉艱難粗識機變又綏集荒陬遠人頗亦畏服雖不

能貽厥孫謀猶足以終其一世前歲表許十月送曇無  
讖及臣往迎便乖本意不忠不信於是而甚禮者身之  
輿敬者行之本未有無禮不敬而能久享福祿以臣觀  
之不復周矣世祖曰若如卿言則効在無遠其子必復  
襲世襲世之後早晚當滅順對曰臣略見其子竝非才  
俊能保一隅如聞敦煌太守牧犍器性粗立若繼蒙遜  
者必此人也然比之於父僉云不逮殆天所用資聖明  
也世祖曰朕今方事于東未暇營西如卿所言三五年  
間不足爲晚且停前計以爲後圖旣而蒙遜死問至世  
祖謂順曰卿言蒙遜死今則驗矣又言牧犍立何其妙



哉朕剋涼州亦當不遠於是賜絹千匹廐馬一乘進號  
安西將軍寵待彌厚政之巨細無所不參崔浩惡之順  
凡使涼州十有二返世祖稱其能而蒙遜數與順遊宴  
頗有悖慢之言恐順東還泄之朝廷尋以金寶納順懷  
中故蒙遜罪覺得不聞徹浩知之密言於世祖世祖未  
之信太延三年順復使涼州及還世祖曰昔與卿密圖  
期之無遠但以頃年東伐未遑西顧荏苒之間遂及于  
此今和龍旣平三方無事比繕甲治兵指營河右掃蕩  
萬里今其時也卿往復積歲洞鑿廢興若朕此年行師  
當剋以不順對曰臣疇日所啓私謂如然但民勞旣久

朱獲寧息不可頻動以增勞悴願待他年世祖從之五年議征涼州順議以涼州乏水草不宜遠征與崔浩庭諍浩固執以爲宜征世祖從浩議及至姑臧甚豐水草世祖與恭宗書以言其事頗銜順後謂浩曰卿昔所言今果驗矣浩曰臣之所言虛實皆如此類初蒙遜有西域沙門曇無讖微有方術世祖詔順令蒙遜送之京邑順受蒙遜金聽其殺之世祖克涼州後聞而嫌順涼土旣平詔順差次羣臣賜以爵位順頗受納品第不平涼州人徐桀發其事浩又毀之云順昔受牧犍父子重賂每言涼州無水草不可行師及陛下至姑臧水草豐足

其詐如此幾誤國事不忠若是反言臣讒之於陛下世祖大怒真君三年遂刑順於城西順死後數年其從父弟孝伯爲世祖知重居中用事及浩之誅世祖怒甚謂孝伯曰卿從兄往雖誤國朕意亦未便至此由浩譖毀朕忿遂盛殺卿從兄者浩也皇興初順子敷等貴寵顯祖追贈順侍中鎮西大將軍太尉公高平王諡曰宣王妻邢氏曰孝妃順四子

長子敷字景文真君二年選入中書教學以忠謹給侍東宮又爲中散與李訢盧遐度世等竝以聰敏內參機密出入詔命敷性謙恭加有文學高宗寵遇之遷祕書

下大夫典掌要切加前軍將軍賜爵平棘子後兼錄南  
部遷散騎常侍南部尚書中書監領內外祕書襲爵高  
平公朝政大議事無不關及劉彧徐州刺史薛安都司  
州刺史常珍奇以彭城懸瓠降附于時朝議謂彼誠僞  
未可信保敷乃固執必然曰劉氏喪亂釁起蕭牆骨肉  
內離藩屏外叛今以皇朝之靈兵馬之力兼并之會宜  
在於今況安都珍奇識機歸命奉誠萬里小民元元企  
仰皇化今之事機安可復失於是衆議乃同遣師接援  
淮海寧輯敷有力焉敷旣見待二世兄弟親戚在朝者  
十有餘人弟奕又有寵於文明太后李訢列其惡罪二

十餘條顯祖大怒皇興四年冬誅敷兄弟削順位號爲庶人敷從弟顯德妹夫廣平宋叔珍等皆坐鬪亂公私同時伏法敷兄弟敦崇孝義家門有禮至於居喪法度吉凶書記皆合典則爲北州所稱美旣至斯禍時人歎惜之

敷長子伯和次仲良與父俱死伯和走竄歲餘爲人執送殺之伯和有庶子孝祖年小藏免後敷妻崔氏得出宮養之至平涼太守

敷弟式字景則學業知名歷散騎常侍平東將軍西兗州刺史濮陽侯式自以家據權要心慮危禍常敕津吏

臺有使者必先啓告然後渡之既而使人平曉卒至津吏欲先告式使者給云我須南還不停此州不煩令刺史知也津人信之與使俱渡使者既濟突入執式赴都與兄俱死

式子憲字仲軌清粹善風儀好學有器度太和初襲爵又降爲伯拜祕書中散雅爲高祖所賞稍遷散騎侍郎接對蕭衍使蕭琛范雲以母老乞歸養拜趙郡太守趙脩與其州里脩歸葬父母也牧守以下畏之累跡推憲不爲之屈時人高之轉授驍騎將軍尚書左丞長兼吏部郎中遷長兼司徒左長史定州大中正尋遷河南尹

參議新令於尚書上省永平三年出爲左將軍兗州刺史四年坐事除名後以黨附高肇爲御史所劾事具高聰傳正光二年二月肅宗講於國子堂召憲預聽又以子騫爲國子生四年拜光祿大夫復本爵濮陽伯五年除持節安西將軍行雍州刺史尋除七兵尚書加撫軍將軍孝昌初元法僧據徐州反叛詔憲爲使持節假鎮東將軍徐州都督與安豐王延明臨淮王彧等討之會蕭衍遣其豫章王綜據彭城俄而綜降徐州旣平詔遣兼黃門侍郎常景詣軍慰勞賜憲驎騮馬一匹仍除征東將軍揚州刺史淮南大都督二年蕭衍遣其北平將

軍元樹右衛將軍胡龍牙護軍將軍夏侯亶等來寇壽陽樹等從下蔡軍於城之東北亶從黎漿而屯於城南憲謂不先破元樹等則夏侯亶無由可剋乃遣子長鈞率衆逆戰軍敗長鈞見執樹等乘之憲力屈以城降因求還國衍聽歸旣至敕付廷尉三年秋憲女壻安樂王鑒據相州反靈太后謂鑒心懷劫脅遂詔賜憲死時年五十八永熙中贈使持節侍中都督定冀相殷四州諸軍事驃騎大將軍儀同三司尚書令定州刺史諡曰文

靜

子希遠字景冲早卒



子祖悛襲祖爵齊受禪例降

希遠兄長鈞興和中梁州驃騎府長史

希遠第二弟希宗字景玄出後憲兄性寬和儀貌雅麗涉獵書傳有文才起家太尉參軍事轉直後領侍御史遷通直散騎常侍尋爲東南道行臺郎珍右丞與諸軍討賊於彭沛克之轉齊獻武王大行臺郎中遷散騎常侍中軍大將軍金紫光祿大夫獻武王擢爲中外府長史爲齊王納其第二女希宗以人望兼美深見禮遇出行上黨太守尋而遭疾興和二年四月卒於郡年四十贈使持節都督定冀滄瀛殷五州諸軍事驃騎大將軍

司空公殷州刺史諡曰文簡

長子祖昇武定末太子洗馬

希宗弟希仁字景山武定末國子祭酒兼給事黃門侍郎

希仁弟騫字希義博涉經史文藻富盛年十四國子學生以聰達見知歷大將軍府法曹參軍太宰府主簿轉中散大夫遷中書舍人加通直散騎常侍曾爲釋情賦曰單闕之年無射之月余承乏攝官直於本省對九重之清切望八襲之崢嶸感代序以長懷觀爽氣而軫慮籠樊之念旣多寥廓之想彌切含毫有思斐然成賦猶

潘生之秋興王子之登閣也廁鄭璞於周寶編魚目於  
隋珠未敢自同作者蓋亦各言爾志云荷峻極之層構  
導積石之洪流有馬形而謨舜亦龍德而史周爰相趙  
之鴻烈逮藩魏之優遊爲衢樽於上葉號木鐸於前修  
若參龍之不隕似窮葉之世濟故抱玉而懷珠且滋蘭  
而樹蕙或舟楫以匡時或棲遲以卒歲尚無忝於先人  
諒貽厥於來裔書金冊以葳蕤布銀繩而昭晰清風忽  
其緬邈啓皇祖於庚寅李伯仁上東門銘曰上東少陽  
厥位在寅條風動物月值孟春

王武子詩曰於顯我王緝乘  
斯民俊明有德嚴恭惟寅

逢軒教之方洽遇周命之

惟新譬龍虎其有合信山川而降神若勝庭之五傑似

不速之三人協嗜欲於將至豈物色而方臻荷天寵以  
來儀步康衢而騁力如乾元之利貞若坤四之方直內  
弼諧於本朝外闢土於殊域乘紫氛以厲羽負青天而  
鼓翼旣公侯之必復亦慶緒之所融績竝樹於八凱道  
俱升於二宮遂遵流以至海且因岳而爲嵩同羽儀於  
班氏均載德於楊公何日月之逾邁引寒暑而相終委  
晉會於弱齒遺堂構於微躬嗟蒙昧之無取故告舍而  
不及已濩落而少成又擁腫而無立愧精堅於百鍊慚  
忠信於十邑非珪璋之特達詎芳菲之易襲未砥礪以  
自進寧琢磨而成章垂宋子之萬字異應生之五行不

請觀於石室豈借書於晉皇求班莊而不遂况蔡文之  
可望參四科其未獲入三選而誰許本無聲於梁魏故  
未聞於陳汝居玉石以多迷宅顯晦而垂所旣無懷於  
四至安有情於再舉雖衣冠之末胄而世祿之緒餘等  
渤澥之乘鴈類九段之逃魚處江淮而不變對朝市而  
閑居空闔門以靖軌非論道而修書少賓客於季彥謝  
朋交於太初在正光之御歷實明皇之拱己曾問政於  
上學著爲君而我齒叫闔人以望予遂陟降於庭止同  
崔駟之謁帝若謝兼之來仕逮孝莊之入統乃道喪而  
時昏水羣飛於溟海火載燎於中原延膠船而越水若

朽索而乘奔玉羊失而無御金雞亡而不存天步忽其  
多難橫流且其云始旣雲擾而海沸亦岳立而碁峙睇  
三綱之日紊見四維之不理顧茂草以傷懷視匪車而  
思起雖風雨之如晦亮膠喈而不已自牽役於宰朝實  
有懷於胥恥在下僚而栖屑願奮迅於泥滓睠故鄉以  
臨睨悵有動於思歸越來流以鼓枻遡北風而結駢入  
成都之舊宅反觀津之故扉乃曲肱而不悶信抱甕而  
無機且耕而食且蠶而衣恒一日以自省亦三月而無  
違遊仁義之肴覈採墳素之精微誠因閑而養拙亦有  
樂於嘉肥及勾芒御節姑洗之首散遲遲於麗日發依

依於弱柳鳥閒關以呼庭花芬披而落牖聽乃越於笙  
簧望有踰於新婦襲成服以逍遙願良辰而聊厚乃席  
壠而踞石遂嘯儔而命偶同浴沂之五六似禊洛之八  
九或促膝以持肩或援笙而鼓缶賓奉萬年之觴主報  
千金之壽各笑語而卒獲傳禮義於不朽斯蓋先民之  
所樂而余心之所守也至於少昊爲帝庚辛處躔視墟  
里之蕭蕭過寒夜之綿綿積霜靄於近援起沆寥於遠  
天思多端以類長若臨水而登山幸出遊之或寫冀觀  
濤之可獨遂杖策緩步或漁或田弋鳧鴈於清溪釣魴  
鯉於深泉張廣幕布長筵酌濁酒割芳鮮起白雪於促

柱奉綠水於危弦賦湛露而不已歌驪駒而未旋跌蕩  
世俗之外疎散造化之間人生行樂聊用永年悟柱下  
之稱工聞首陽之爲拙既有惜於苾懸且自悲於井渫  
訪鄭詹之格言求季主之高說去衡門以策駟望象魏  
而投轍服毳衣以從務乘大車而就列比汗海而無紀  
喻江河而有缺睠重地而懼深念索米而慙結運有折  
於玉斗時忽亡於金鏡始蒙塵以播蕩卒流彘而居鄭  
彼上天之降鑒實下民之請命因艱難以隆基據殷憂  
而啓聖調南風以負辰居北辰而爲政創彝倫於九疇  
班平章於百姓喻繩契以論蹤援成昭而比盛酌徒鎬



之故典究遷亳之遺令奄四海以爲家開七百而增慶  
覩禮樂之方隆信光華之始映百揆鬱以時序四門穆  
其惟清如得人於漢世比多士於周庭有一匡以作相  
或十亂而爲楨各秉文而經武故天平而地成伊余身  
之忝穢得再入於承明執綸言之猶紉戴會弁之如星  
非巡潰以窺井信夕陽而懷驚承周任之有言攬老子  
之知足奉炯誠以周旋抱徽猷而與屬每有偃於唯塵  
恒興言於寵辱思散髮以抽簪願全真而守朴耽疎傳  
以俳個望申公而躑躅冀鄙志之獲展庶微願之逢時  
歌致命而可卜詠歸田而有期揖帝城以高逝與人事

而長辭擊壤而頌結草而嬉援巢父以戲潁追許子而  
升箕供暮餐於沆瀣給朝餌於瓊芝同糟醅而無別混  
名實而不治放言肆慾無慮無思何鷓鷯之可賦鴻鵠  
之爲詩哉尋加散騎常侍殷州大中正鎮南將軍尚書  
左丞仍以本官兼散騎常侍使蕭衍後坐事免論者以  
爲非罪騫嘗贈親友盧元明魏收詩曰幽棲多暇日摠  
駕萃荒坰南瞻帶宮雉北睇拒畦瀛流火時將末懸炭  
漸云輕寒風率已厲秋水寂無聲層陰蔽長野東雨暗  
窮汀侶浴浮還沒孤飛息且驚三褫俄終歲一九曾未  
營閑居同洛溪歸身款武城稍旅原思翟坐夢尹勲荆

監河愛斗水蘇子惜餘明益州達反趣廷尉辯交情豈  
若忻蓬華收志偶沉冥後詔兼太府少卿尋除征南將  
軍給事黃門侍郎死於晉陽所著詩賦碑誄別有集錄  
贈本將軍太常殷州刺史齊受禪重贈使持節侍中都  
督殷滄二州諸軍事車騎大將軍儀同三司仍殷州刺  
史諡曰文惠

騫弟希禮字景節武定末通直散騎常侍

希遠庶長兄劔興和中梁州驃騎府長史

式弟奕字景世美容貌有才藝早歷顯職散騎常侍宿  
衛監都官尚書安平侯與兄敷同死太和初文明太后

追念奕兄弟乃誅李訢存問憲等一二年歲時賜以布帛

奕別生弟罔字道度少爲中散逃避得免太和中拜下大夫南部給事出爲龍驤將軍南豫州刺史還拜冠軍將軍尋除光祿大夫守度支尚書二十一年高祖幸長安罔以咸陽山河險固秦漢舊都古稱陸海勸高祖去洛陽而都之後高祖引見笑而謂之曰卿一昨有啓欲朕都此昔婁敬一說漢祖卽日西駕尚書今以西京說朕仍使朕不廢東轅當是獻可理殊所以今古相反耳罔對曰昔漢祖起於布衣欲藉嶮以自固婁敬之言合

於本旨今陛下百世重光德洽四海事同隆周均其職  
貢是以愚臣獻說不能上動高祖大悅其年罔卒賜錢  
二十萬布百匹朝服一具衣一襲罔性鯁烈敢直言常  
面折高祖彈駁公卿無所回避百寮皆憚之高祖常加  
優禮故車駕巡幸恒兼尚書右僕射雖才學不及諸兄  
然公彊當世堪濟過之

子祐字長禧篤穆友于見稱於世歷位給事中尚書祠  
部郎相州撫軍府長史司空從事中郎博陵太守所在  
亦以清幹著稱

祐弟太字季寧涉歷書傳太尉行軍員外郎

順弟修基陳留太守卒

子探幽

探幽兄子洪鸞河間太守

洪鸞孫恠傑樂陵太守武定中以貪汙賜死

修基季弟暉字善祖小字藥囊少有高名爲中書侍郎  
從世祖征涼州戰沒時人咸惜焉初順與從兄靈從弟  
孝伯竝以學識器業見重於時故能砥礪宗族競名修  
尚靈與族叔詵族弟熙等俱被徵事在高允高士頌

詵字令孫京兆太守詵後繼

闕

秀林小名榼性彊直太和中自中書博士爲頓丘相豪

右畏之景明初試守博陵郡抑彊扶弱政以威嚴爲名以母憂去職後爲太尉諮議參軍假節行荊州事拜司徒司馬加冠軍將軍定州大中正太中大夫正光中卒年六十三贈左將軍齊州刺史

子裔字徽伯出後秀林兄鳳林裔初除汝南王悅常侍稍遷定州別駕孝昌中爲定州鎮軍長史加輔國將軍帶博陵太守于時逆賊杜洛周侵亂州界尋假平北將軍防城都督賊旣圍城裔潛引洛周州遂陷沒洛周僭竊特無綱紀至於市令驛帥咸以爲王呼曰市王驛王乃封裔爲定州王洛周尋爲葛榮所滅裔仍事榮永安

初爾朱榮旣擒葛榮遂繫裔及高敖曹薛修義李無爲等於晉陽從榮至洛榮死乃免普泰初以裔爲持節散騎常侍安北將軍兼給事黃門侍郎慰勞山東大使永熙中除鎮東將軍金紫光祿大夫齊獻武王大丞相諮議參軍天平初以預定策之功封固安縣開國伯食邑四百戶加征東將軍車駕遷鄴爲大行臺右丞留在洛陽監修宮殿尋除使持節大將軍陝州刺史四年八月宇文黑獺攻陷州城被執見害年五十詔贈使持節都督定冀瀛殷四州諸軍事驃騎大將軍尚書令司徒公

定州刺史



子直襲武定末司徒屬齊受禪例降

裔弟景義大司馬諮議參軍殷州大中正

景義弟伯穆武定末合州刺史

秀林從弟煥字仲文小字醜瓌有幹用少與酈道元俱爲李彪所知自給事中轉治書侍御史恒州刺史穆泰據代都謀反高祖詔煥與任城王澄推治之煥先驅至州宣旨曉喻仍誅泰等景明初遷司空從事中郎蕭寶卷豫州刺史裴叔業以壽春歸附詔煥以本官爲軍司與楊大眼奚康生等率衆迎接煥至淮西叔業兄子植遣使送質煥等濟師入城撫慰民咸忻悅仍行揚州事

賜爵容城伯軍還行河內郡事拜司徒右長史以荆蠻擾動敕煥兼散騎常侍慰勞之降者萬餘家除輔國將軍梁州刺史時武興氏楊集起舉兵作逆令弟集義邀斷白馬戍敕假煥平西將軍督別將石長樂統軍王祐等與軍司苟金養俱討之大破集起軍會秦州民呂苟兒反煥仍令長樂等由麥積崖赴援屬都督元麗至遂共平之時氏王楊定進猶據方山與苟兒影響煥密募氏趙芒路斬定進還朝遇患卒時年四十四贈征虜將軍幽州刺史諡曰昭

子密武定中襄州刺史

秀林族子肅字彥邕歷奉朝請清河王懌郎中令稍遷洛陽令步兵校尉員外常侍初諂附待中元暉後以左道事侍中穆紹常裸身被髮畫腹銜刀於隱屏之處爲紹求福故紹愛之延昌四年薦肅爲黃門郎加光祿大夫肅爲性酒狂熙平初從靈太后幸江陽王繼第肅時侍飲頗醉言辭不遜抗辱太傅清河王懌爲有司彈劾靈太后怒之出爲章武內史歲餘遷右將軍夏州刺史卒贈左將軍齊州刺史

肅從弟暉字景林有學識初除奉朝請太學博士司空主簿以母憂去職服闋拜左軍將軍正光中元乂以其

弟羅爲青州刺史暉爲羅平東府長史遷廷尉少卿殷  
州大中正孝昌二年冬卒年五十七贈平東將軍齊州  
刺史諡曰宣

子慎武定中東平太守

暉從弟仲璇奉朝請定雍二州長史太尉諮議中散太  
中大夫東郡汲郡二郡太守司徒左長史弘農太守先  
是宮牛二姓阻嶮爲害仲璇示以威惠竝卽歸伏還除  
衛將軍金紫光祿大夫仍除北雍州刺史將軍如故轉  
車騎將軍左光祿大夫天平初遷都於鄴以仲璇爲營  
構將作進號衛大將軍出除車騎大將軍兗州刺史仲

璇以孔子廟牆宇頗有頽毀遂改修焉還除將作大匠  
所歷竝清勤有聲年六十六卒贈驃騎大將軍儀同三  
司青州刺史

子希良侍御史

詵從子善犯孝靜諱趙郡太守

子顯進州主簿

顯進子映字輝道南安王國常侍光州征虜府主簿相  
州治中寧朔將軍步兵校尉孝昌三年冬卒年四十二  
天平中贈通直散騎常侍輔國將軍殷州刺史

子普濟武定中北海太守

映弟育字仲遠奉朝請稍遷揚烈將軍奉車都尉都督相州防城別將以拒葛榮之勲賜爵趙郡公後除征東將軍金紫光祿大夫天平四年夏卒年五十七贈驃騎大將軍都官尚書定州刺史諡曰貞

子惜襲武定末齊文襄王大將軍府記室參軍齊受禪爵例降

顯進弟恃顯位至左中郎將卒贈中壘將軍安州刺史恃顯養京兆王愉妾楊氏爲女愉改楊姓爲李而親念恃顯恃顯子道舒與愉同逆愉敗走免

第三子道璩武定末范陽太守

道璩弟道瓘少以父譴被刑位至中常侍

恃顯弟曄字季顯涉歷書史司徒行參軍稍遷濟州輔國府長史坐兄事免後除尚書中兵郎遷冠軍中散大夫正光二年南荊州刺史桓叔興驅掠城民叛入蕭衍衍資以兵糧令築谷陂城以立洛州逼土山戍詔曄持節兼尚書左丞爲行臺督諸軍討叔興大破之乘勝拔谷陂叔興退走軍還仍除尚書左丞出除洛州刺史將軍如故未拜卒贈左將軍齊州刺史

子暉賓美容貌寬和沉雅太學博士

暉賓弟山儒少而清立學涉羣書山儒少弟大蓋竝早

卒

暉族弟孝怡字悅宗中書學生相州高陽王雍主簿廣陵王羽掾新蔡太守別將蕭寶夤長史從中山王英破蕭衍臨川王蕭宏於梁城除朔州安北府長史又爲中堅將軍相州鎮北府長史遷冠軍將軍魏郡太守相州刺史中山王熙據鄴起兵也孝怡陰結募城民與熙長史柳元章別駕游荆之等率衆擒熙賞爵昌樂伯靈太后反政以孝怡義黨除名爲民後安樂王鑿鎮鄴起孝怡爲別將永安初除左將軍太中大夫仍爲防城都督以拒葛榮之勲賜爵趙郡公拜撫軍將軍光祿大夫永



安三年行殷州事遷驃騎大將軍左光祿大夫武定六年卒八十

子思道儀同開府中兵參軍武城縣公

熙字仲熙神麈中與高允等俱被徵拜中書博士轉侍郎以使沮渠有功賜爵元氏子加中壘將軍卒贈鎮東將軍豫州刺史諡曰莊

子季王襲卒贈青州刺史諡曰貞

子遺元襲初除冀州趙郡王幹東閣祭酒累轉尚書左民郎中冀州京兆王愉功曹參軍帶扶柳令爲愉所親逼與同反愉敗遺元逃竄會赦乃雪復除兗州平東府

長史後拜中堅將軍殷州征北將軍長史卒年六十三  
贈征北將軍定州刺史

子恃寧以父事被刑武定末官至中尹

恃寧弟子寧襲爵開府默曹參軍齊禪爵例降

熙族孫蘭和自右軍將軍歷平陽勃海二郡太守

蘭和弟蘭集平昌太守

熙族孫同軌體貌魁岸腰帶十圍學綜諸經多所治誦  
兼讀釋氏又好醫術年二十二舉秀才射策除奉朝請  
領國子助教轉著作郎典儀注修國史遷國子博士加  
征虜將軍永熙二年出帝幸平等寺僧徒講說敕同軌

論難音韻閒朗往復可觀出帝善之三年春釋菜詔延公卿學官於顯陽殿敕祭酒劉廐講孝經黃門李郁講禮記中書舍人盧景宣解大戴禮夏小正篇時廣招儒學引令預聽同軌經義素優辯析兼美而不得執經深爲慨恨太平中轉中書侍郎興和中兼通直散騎常侍使蕭衍衍深耽釋學遂集名僧於其愛敬同泰二寺講涅槃大品經引同軌預席衍兼遣其臣竝共觀聽同論難久之道俗咸以爲善盧景裕卒齊獻武王引同軌在館教諸公子甚嘉禮之每旦入授日暮始歸緇素請業者同軌夜爲解說四時恒爾不以爲倦武定四年夏卒

年四十七時人傷惜之齊獻武王亦殊嗟悼賻襚甚厚  
贈驃騎大將軍瀛州刺史謚曰康

同軌兄義深武定中齊州刺史

同軌弟幼舉安德太守武定中以在郡貪汙輒召部曲  
還京師棄市

幼舉弟之良有幹用前將軍尚書金部郎卒

之良弟稚廉武定末并州儀同開府長史

史臣曰李順器宇才識一時推重謀宣中國氣折外蕃  
所以世祖垂心而崔浩側目敷式兄弟位望竝高憲風  
度恢雅夙重朝列而遭隋有命報施俱爽嗚呼以茲盛

德克廣其猷宗緒扶疎人位盛顯可謂李雖舊族其世  
唯新矣

魏書卷三十六考證

李順傳推憲不爲之屈○北史作憲不爲屈此推字殆  
惟字之訛也

啓皇祖於庚寅○本書本無注此獨引李伯仁上東門  
銘厥位在寅王武子詩嚴恭唯寅寅作注又與本句庚  
寅全不相涉未詳其故

魏書卷三十六考證

魏書卷三十七

齊

魏

收

撰

列傳第二十五

司馬休之

司馬楚之

司馬景之

司馬叔璠

司馬天助

司馬休之字季豫本河內溫人晉宣帝季弟譙王進之

後也司馬叡僭立江南又以進子孫襲封至休之父恬

爲司馬昌明鎮北將軍青兗二州刺史天興五年休之

爲司馬德宗平西將軍荊州刺史爲桓玄逼逐遂奔慕

容德劉裕誅玄後還建鄴裕復以休之爲荊州刺史休



之頗得江漢人心劉裕疑其有異志而休之子文思繼  
休之兄尚之爲譙王謀圖裕裕執送休之令自爲其所  
休之表廢文思并與裕書陳謝神瑞中裕收休之子文  
寶兄子文祖並殺之乃率衆討休之休之上表自陳於  
德宗與德宗鎮北將軍魯宗之宗之子竟陵太守軌等  
起兵討裕裕軍至江陵休之不能敵遂與軌奔襄陽裕  
復進軍討之太宗遣長孫嵩屯河東將爲之援時姚興  
征虜將軍姚成王冠軍將軍司馬國璠亦將兵救之不  
及而還休之遂與子文思及宗之等奔於姚興裕滅姚  
泓休之與文思及德宗河間王子道賜輔國將軍溫楷

竟陵內史魯軌荊州治中韓延之殷約平西參軍桓謐  
桓璉及桓溫孫道度道子勃海刁雍陳郡袁式等數百  
人皆將妻子詣嵩降月餘休之卒于嵩軍詔曰司馬休  
之率其同義萬里歸誠雅操不遂中年殞喪朕甚愍焉  
其追贈征西大將軍右光祿大夫諡始平聲公

文思與淮南公國璠池陽子道賜不平而僞親之引與  
飲宴國璠性疏直因酒醉遂語文思言已將與溫楷及  
三城胡曾王珍曹栗等外叛因說京師豪彊可與爲謀  
數十人文思告之皆坐誅以文思爲廷尉卿賜爵鬱林  
公善於其職聽訟斷獄百姓不復匿其情劉義隆遣將

裴方明擊楊難當於仇池世祖以文思爲假節征南大將軍進爵譙王督洛豫諸軍南趣襄陽邀其歸路還京爲懷朔鎮將與安初薨

子彌陁襲爵以選尚臨涇公主而辭以先取毗陵公竇瑾女與瑾竝坐祝詛伏誅

司馬楚之字德秀晉宣帝弟太常馗之八世孫父榮期司馬德宗梁益二州刺史爲其參軍楊承祖所殺楚之時年十七送父喪還丹陽值劉裕誅夷司馬戚屬叔父宣期兄貞之竝爲所殺楚之乃亡匿諸沙門中濟江自歷陽西入義陽竟陵蠻中及從祖荊州刺史休之爲裕

所敗乃亡於汝潁之間楚之少有英氣能折節待士與  
司馬順明道恭等所在聚黨及劉裕自立楚之規欲報  
復收衆據長社歸之者常萬餘人劉裕深憚之遣刺客  
沐謙害楚之楚之待謙甚厚謙夜詐疾知楚之必自來  
因欲殺之楚之聞謙病果自齋湯藥往省之謙感其意  
乃出匕首於席下以狀告之曰將軍爲裕所忌憚願不  
輕率以保全爲先楚之歎曰若如來言雖有所防恐有  
所失謙遂委身以事之其推誠信物得士之心皆此類  
也太宗末山陽公奚斤略地河南楚之遣使請降因表  
曰江淮以北聞王師南首無不抃舞思奉德化而逼於

寇逆無由自致臣因民之欲請率慕義爲國前驅今皆  
白衣無以制服人望若蒙偏裨之號假王威以唱義則  
莫不率從於是假楚之使持節征南將軍荊州刺史奚  
斤旣平河南以楚之所率戶民分置汝南南陽南頓新  
蔡四郡以益豫州世祖初楚之遣妻子內居於鄴尋徵  
入朝時南藩諸將表劉義隆欲入爲寇以楚之爲使持  
節安南大將軍封琅邪王屯潁州以距之其長史臨邑  
子步還表曰楚之渡河百姓思舊義衆雲集汝潁以南  
望風翕然回首革面斯誠陛下應天順民聖德廣被之  
所致也世祖大悅璽書勞勉賜前後部鼓吹義隆將到

彥之沂河而西列守南岸至於潼關及彥之等退走楚之破其別軍於長社又與冠軍將軍安頡攻滑臺拔之擒義隆將朱脩之李元德及東郡太守申謨俘萬餘人上疏曰臣奉命南伐受任一方而智力淺短誠節未効所以夙夜憂惶忘寢與食臣屢遣人至荆揚所在陳說具論天朝盛化之美莫不忻承聖德傾首北望而義隆兄弟知人情搖動遣臣私讐順爲司州刺史統淮北七郡代垣苗守懸瓠自鞏洛滑臺敗散以來義隆恥其敗北多加罪罰到彥之削位退同卒伍殺姚縱夫於壽春斬竺靈秀於彭城王休元託疾檀道濟斥放凡在腹心

悉懷疑阻民怨臣猜可謂今日臣聞平殄寇逆必乘戰  
勝之威建立功勳亦因離貳之勢伏惟陛下聖德膺符  
道光四海神旌所指莫不摧服其未賓者義隆而已今  
天網遐舉殊方仰德固宜掃清東南齊一區宇使濟濟  
之風被於江漢世祖以兵久勞不從以散騎常侍徵還  
從征涼州以功賜隸戶一百義隆遣將裴方明胡崇之  
寇仇池以楚之爲假節與淮陽公皮豹子等督關中諸  
軍從散關西入擊走方明擒崇之仇池平而還車駕伐  
蠕蠕詔楚之與濟陰公廬中山等督運以繼大軍時鎮  
北將軍封沓亡入蠕蠕說令擊楚之等以絕糧運蠕蠕

乃遣奸覘入楚之軍截驢耳而去有告失驢耳者諸將莫能察楚之曰必是覘賊截之以爲驗耳賊將至矣卽使軍人伐柳爲城水灌之令凍城立而賊至冰峻城固不可攻逼賊乃走散世祖聞而嘉之尋拜假節侍中鎮西大將軍開府儀同三司雲中鎮大將朔州刺史王如故在邊二十餘年以清儉著聞和平五年薨時年七十五高宗悼惜之贈都督梁益秦寧四州諸軍事征南大將軍領護西戎校尉揚州刺史諡貞王陪葬金陵

長子寶胤與楚之同入國拜中書博士鴈門太守卒

楚之後尚諸王女河內公主生子金龍字榮則少有父



風初爲中書學生入爲中散顯祖在東宮擢爲太子侍  
講後襲爵拜侍中鎮西大將軍開府雲中鎮大將朔州  
刺史徵爲吏部尚書太和八年薨贈大將軍司空公冀  
州刺史謚康王贈絹一千疋金龍初納太尉隴西王源  
賀女生子延宗次纂次悅後娶沮渠氏生徽亮卽河南  
王沮渠牧犍女世祖妹武威公主所生也有寵於文明  
太后故以徽亮襲例降爲公坐連穆泰罪失爵延宗父  
亡後數年卒

子裔字承業世宗時悅等爲裔理嫡還襲祖爵位至後  
軍將軍卒贈征虜將軍洛州刺史

子藏襲齊受禪例降

纂字茂宗中書博士歷司州治中別駕河內邑中正承平元年卒贈鎮遠將軍南青州刺史諡曰肅

子澄字元鏡司州秀才司空功曹參軍給事中卒贈龍驤將軍夏州刺史

澄弟仲粲武定中尚書左丞

悅字慶宗自司空司馬出爲立節將軍建興太守轉寧朔將軍司州別駕遷太子左衛率河北太守世宗初除鎮遠將軍豫州刺史時有汝南上蔡董毛奴者齎錢五千死在道路郡縣疑民張堤爲劫又於堤家得錢五千

堤懼拷掠自誣言殺獄既至州悅觀色察言疑其不實引見毛奴兄靈之謂曰殺人取錢當時狼狽應有所遺此賊竟遺何物靈之云唯得一刀鞘而已悅取鞘視之曰此非里巷所爲也乃召州城刀匠示之有郭門者前曰此刀鞘門手所作去歲賣與郭民董及祖悅收及祖詰之曰汝何故殺人取錢而遺刀鞘及祖歛引靈之又於及祖身上得毛奴所著皂襦及祖伏法悅之察獄多此類也豫州于今稱之悅與鎮南將軍元英攻義陽克之詔改蕭衍司州爲郢州以悅爲征虜將軍郢州刺史蕭衍遣其豫州刺史馬仙理左軍將軍永陽戍主陳可

等率衆一萬於三關南六十里因山起城名爲竹墩遣其輔國將軍濟陰太守薊沛精卒二千以戍之後於關南四十里麻陽舊柵起城仙琚輕騎東南爲之節度關南之民多懷兩望悅令西關統軍諸靈鳳掩擊敗之盡燔其城樓儲積擒薊沛及其輔國將軍軍主劉靈秀詔曰司馬悅首謀義陽征略有捷且違京旣久屢請入朝可遂此志聽其赴關尋詔以本將軍爲豫州刺史論義陽之勲封漁陽縣開國子食邑三百戶永元元年城人白早生謀爲叛逆遂斬悅首送蕭衍旣而邢巒復懸瓠詔曰司馬悅暴罹橫酷身首異所國戚舊勲特可悼念

主書董紹銜命公行囚漂殊域事可矜愍尚書可量賊將齊苟兒等四人之中分遣二人勅揚州爲移以易悅首及紹迎接還本用慰亡存贈平東將軍青州刺史賜帛三百疋諡曰莊子肫襲爵

肫尚世宗妹華陽公主拜駙馬都尉特除員外散騎常侍加鎮遠將軍正光五年公主薨月餘肫卒贈左將軍滄州刺史

子鴻字慶雲性麤武襲爵位至都水使者坐與西賊交通賜死

子孝政襲齊受禪爵例降

金龍弟躍字寶龍尚趙郡公主拜駙馬都尉代兄爲雲中鎮將朔州刺史假安北將軍河內公躍表罷河西苑封與民墾殖有司執奏此麋鹿所聚太官取給今若與民至於奉獻時禽懼有所闕詔曰此地若任稼穡雖有獸利事須廢封若是山澗虞禁何損尋先朝置此豈苟藉斯禽亮亦以俟軍行薪蒸之用其更論之躍固請宜以與民高祖從之還爲祠部尚書太鴻臚卿潁川王師以疾表求解任太和十九年卒贈金紫光祿大夫賜朝服一具衣一襲絹一千匹楚之父子相繼鎮雲中朔土服其威德

司馬景之字洪略晉汝南王亮之後太宗時歸闕爵蒼梧公加征南大將軍清直有節操太宗甚重之卒贈汝南王

子師子襲爵

景之兄準字巨之以泰常末率三千餘家歸國時太宗在虎牢授寧遠將軍新蔡公假相州刺史隨駕至京出除廣寧太守悅近來遠清儉有稱世祖嘉之賜布六百疋後降號爲平遠將軍改爲密陵侯興光初卒

子安國襲爵

司馬叔璠晉安平獻王孚之後也父曇之司馬德宗河

間王桓立劉裕之際叔璠與兄國璠北奔慕容超後西  
投姚興劉裕滅姚泓北奔屈丐世祖平統萬兄弟俱入  
國國璠賜爵淮南公卒無子爵除叔璠安遠將軍丹楊  
侯卒

長子靈壽神麈中與弟道壽俱來歸國靈壽冠軍將軍  
溫縣侯道壽寧朔將軍宜陽子靈壽出除陳郡太守劉  
義隆侵境詔靈壽招引義士得二千餘人從西平公安  
頡破虎牢滑臺洛陽三城徙五百餘家入河內又從討  
蠕蠕西征涼州所在著功出爲遼西太守治有清儉之  
稱太和九年卒贈懷州刺史諡曰靖靈壽娶太宰頓丘



王李峻女與婦父雅不相善每見抑退故位不大至

子惠安高祖時襲爵歷恒州別駕桑乾太守太尉諮議  
參軍事卒

子祖珍年十五舉司州秀才解褐員外散騎侍郎年十  
八先父卒

祖珍弟宗龐世宗時父惠安以久病啓以爵轉授解褐  
安定王府騎兵參軍洛州龍驤府司馬善射未曾自伐  
性閑淡少所交遊識者云其淳至永安中卒

子嵩亮襲

惠安弟直安歷位尚書郎濟北濟南二郡太守員外散

騎常侍蕭寶夤征鍾離引爲長史坐軍退免官加刑以疾得免尋除東平原太守還京爲中散大夫加征虜將軍太中大夫遷左將軍正光四年卒贈大將軍濟州刺史

子龍泉滄州開府長史

道壽長子元興襲父爵

子景和給事中稍遷揚州驃騎府長史清河內史正光元年卒贈左將軍平州刺史

元興弟仲明侍御史中書舍人以謹敏著稱稍遷衛尉少卿仍領舍人出爲征虜將軍涼州刺史坐貪殘爲御

史所彈遇赦免積年不敘後娶靈太后從姊爲繼室除武衛將軍征虜將軍轉光祿大夫武衛如故遷大司農卿加安東將軍散騎常侍出爲安北將軍恒州刺史常侍如故正光五年卒

子彥邕有風望正員郎稍遷相州刺史驃騎大將軍左光祿大夫天平四年卒贈散騎常侍都督懷洛二州諸軍事驃騎大將軍儀同三司懷州刺史

司馬天助自云司馬德宗驃騎將軍元顯之子劉裕自立乃來歸闕除平東將軍青徐二州刺史東海公天助招率義士欲襲裕東平濟北二郡及城戍又破裕將閭

萬齡軍前後多所虜獲拜侍中都督青徐兗三州諸軍事征東將軍青兗二州刺史公如故真君二年與司馬文思等南討還又從駕北征在陣歿

子元伯字歸都襲爵後降溫縣子太和中爲建威將軍泰山太守

史臣曰諸司馬以亂亡歸命楚之風槩器略最可稱乎其  
其餘未足論也而以往代遺緒竝當位遇可謂幸矣

魏書卷三十七

魏書卷三十七考證

司馬叔璠傳丹楊侯○楊一本作陽晉書地理志丹陽郡有丹楊縣注丹陽山多赤柳在西也今人槩改楊爲陽誤矣

魏書卷三十七考證

魏書卷三十八

齊

魏

收

撰

列傳第二十六

刁雍

王慧龍

韓延之

袁式

刁雍字淑和渤海饒安人也高祖攸晉御史中丞曾祖協從司馬叡渡江居于京口位至尚書令父暢司馬德宗右衛將軍初暢兄達以劉裕輕狡薄行負社錢三萬違時不還執而徵焉及裕誅桓玄以嫌故先誅刁氏雍爲暢故吏所匿奔姚興豫州牧姚紹於洛陽後至長安雍博覽書傳姚興以雍爲太子中庶子泰常二年姚泓



滅與司馬休之等歸國上表陳誠於南境自効太宗許之假雍建議將軍雍遂於河濟之間招集流散得五千餘人南阻大關擾動徐兗建牙誓衆傳檄邊境劉裕遣將李嵩等討雍雍斬之於蒙山於是衆至二萬進屯固山七年三月雍從弟彌亦率衆入京口規共討裕裕遣兵破之六月雍又侵裕青州雍敗乃收散卒保於馬耳山又爲裕青州軍所逼遂入大鄉山八年太宗南幸鄴朝於行觀問先聞卿家縛劉裕於卿親疎雍曰是臣伯父太宗笑曰劉裕父子當應憚卿又謂之曰朕先遣叔孫建等攻青州民盡藏避城猶未下彼旣素憚卿威士

民又相信服今欲遣卿助建等卿宜勉之於是假雍鎮東將軍青州刺史東光侯給五萬騎使別立義軍建先攻東陽雍至招集義衆得五千人遣撫慰郡縣土人盡下送租供軍是時攻東陽平其北城三十許步劉義符青州刺史竺夔於城內鑿地道南下入澠水澗以爲退路雍謂建曰此城已平宜時入取不者走盡建懼傷兵士難之雍曰若懼傷官兵者雍今請將義兵先入建不聽夔欲東走會義符遣其將檀道濟等救青州雍謂建曰賊畏官軍突騎以鎖連車爲函陣大峴已南處處狹隘不得方軌雍求將義兵五千要嶮破之建不聽曰兵

人不宜水土疫病過半若相持不休兵自死盡何須復戰今不損大軍安全而返計之上也建乃引還雍遂鎮尹卯固又詔令南入以亂賊境雍攻克項城會有勅追令隨機立効雍於是招集譙梁彭沛民五千餘家置二十七營遷鎮濟陰延和二年立徐州於外黃城置譙梁彭沛四郡九縣以雍爲平南將軍徐州刺史賜爵東安侯在鎮七年太延四年徵還京師頻歲爲邊民所請世祖嘉之真君二年復授使持節侍中都督揚豫兗徐四州諸軍事征南將軍徐豫二州刺史三年劉義隆將裴方明寇陷仇池詔雍與建興公古弼等十餘將討平之

五年以本將軍爲薄骨律鎮將至鎮表曰臣蒙寵出鎮奉辭西藩總統諸軍戶口殷廣又搃勒戎馬以防不虞督課諸屯以爲儲積夙夜惟憂不遑寧處以今年四月未到鎮時以夏中不及東作念彼農夫雖復布野官渠乏水不得廣殖乘前以來功不充課兵人口累率皆飢儉略加檢行知此土稼穡艱難夫欲育民豐國事須大田此土乏雨正以引河爲用觀舊渠堰乃是上古所制非近代也富平西南三十里有艾山南北二十六里東西四十五里鑿以通河似禹舊迹其兩岸作溉田大渠廣十餘步山南引水入此渠中計昔爲之高於水不過

一丈河水激急沙土漂流今日此渠高於河水二丈三尺又河水浸射往往崩頽渠漑高懸水不得上雖復諸處按舊引水水亦難求今艾山北河中有洲渚水分爲二西河小狹水廣百四十步臣今求入來年正月於河西高渠之北八里分河之下五里平地鑿渠廣十五步深五尺築其兩岸令高一丈北行四十里還入古高渠卽循高渠而北復八十里合百二十里大有良田計用四千人四十日功渠得成訖所欲鑿新渠口河下五尺水不得入今求從小河東南岸斜斷到西北岸計長二百七十步廣十步高二丈絕斷小河二十日功計得成

畢合計用功六十日小河之水盡入新渠水則充足溉  
官私田四萬餘頃一旬之間則水一遍水凡四溉穀得  
成實官課常充民亦豐贍詔曰卿憂國愛民知欲更引  
河水勸課大田宜便興立以克就爲功何必限其日數  
也有可以便國利民者動靜以聞七年雍表曰奉詔高  
平安定統萬及臣所守四鎮出車五千乘運屯穀五十  
萬斛付沃野鎮以供軍糧臣鎮去沃野八百里道多深  
沙輕車來往猶以爲難設令載穀不過二十石每涉深  
沙必致滯陷又穀在河西轉至沃野越渡大河計車五  
千乘運十萬斛百餘日乃得一返大廢生民耕墾之業

車牛艱阻難可全至一歲不過二運五十萬斛乃經三年臣前被詔有可以便國利民者動靜以聞臣聞鄭白之渠遠引淮海之粟沂流數千周年乃得一至猶稱國有儲糧民用安樂今求於牽屯山河水之次造船二百艘二船爲一舫一船勝穀二千斛一舫十人計須千人臣鎮內之兵率皆習水一運二十萬斛方舟順流五日而至自沃野牽上十日還到合六十日得一返從三月至九月三返運送六十萬斛計用人功輕於車運十倍有餘不費牛力又不廢田詔曰知欲造船運穀一冬卽成大省民力旣不費牛又不廢田甚善非但一運自可

永以爲式令別下統萬鎮出兵以供運穀卿鎮可出百  
兵爲船工豈可專廢千人須遣船匠猶須卿指授未可  
專主也諸有益國利民如此者續復以聞九年雍表曰  
臣聞安不忘亂先聖之政也況綏服之外帶接邊城防  
守不備無以禦敵者也臣鎮所綰河西爰在邊表常懼  
不虞平地積穀實難守護兵人散居無所依恃脫有妖  
姦必致狼狽雖欲自固無以得全今求造城儲穀置兵  
備守鎮自建立更不煩官又於三時之隙不令廢農一  
歲二歲不訖三歲必成立城之所必在水陸之次大小  
高下量力取辦詔許之至十年三月城訖詔曰卿深思



遠慮憂勤盡思知城已周訖邊境無不虞之憂千載有  
永安之固朕甚嘉焉卽名此城爲刁公城以旌爾功也  
興光二年詔雍還都拜特進將軍如故和平六年表曰  
臣聞有國有家者莫不禮樂爲先故樂記云禮所以制  
外樂所以修內和氣中釋恭敬溫文是以安上治民莫  
善於禮易俗移風莫善於樂且於一民一俗尚須崇而  
用之況統御八方陶鈞六合者哉故帝堯修五禮以明  
典章作咸池以諧萬類顯皇軌於云岱揚鴻化於介丘  
令木石革心鳥獸率舞包天地之情達神明之德夫感  
天動神莫近於禮樂故大樂與天地同和大禮與天地

同節和故百物阜生節故報天祭地禮行於郊則上下和肅肅者禮之情和者樂之致樂至則無怨禮至則不違揖讓而治天下者禮樂之謂歟唯聖人知禮樂之不可以已故作樂以應天制禮以配地所以承天之道治人之情故王者治定制禮功成作樂虞夏殷周易代而起及周之末王政陵遲仲尼傷禮樂之崩亡痛文武之將墜自衛返魯各得其中逮乎秦皇翦棄道術灰滅典籍籍坑燼儒士盲天下之目絕象魏之章簫韶來儀不可復矣賴大漢之興改正朔易服色協音樂制禮儀正聲古禮粗欲周備至於孝章每以三代損益優劣殊軌歎

其薄德無以易民視聽博士曹褒覩斯詔也知上有制  
作之意乃上疏求定諸儀以爲漢禮終於休廢寢而不  
行及魏晉之日修而不備伏惟陛下無爲以恭己使賢  
以御世方鳴和鸞以陟岱宗陪羣后以昇中岳而三禮  
關於唐辰象舞替於周日夫君舉必書古之典也柴望  
之禮帝王盛事臣今以爲有其時而無其禮有其德而  
無其樂史闕封石之文工絕清頌之饗良由禮樂不興  
王政有缺致也臣聞樂由禮所以象德禮由樂所以防  
淫五帝殊時不相沿三王異世不相襲事與時竝名與  
功偕故也臣識昧儒先管窺不遠謂宜修禮正樂以光

大聖之治詔令公卿集議會高宗崩遂寢皇興中雍與隴西王源賀及中書監高允等竝以耆年特見優禮錫雍几杖劔履上殿月致珍羞焉雍性寬柔好尚文典手不釋書明敏多智凡所爲詩賦頌論并雜文百有餘篇又汎施愛士恬靜寡欲篤信佛道著教誡二十餘篇以訓導子孫太和八年冬卒年九十五賜命服一襲贈帛五百疋贈儀同三司冀州刺史將軍如故諡曰簡雍長子纂字奉宗中書侍郎早卒

纂弟遵字奉國襲爵

遵弟紹字奉世武騎侍郎汝陰王天賜涼州征西府司

紹弟獻字奉章祕書郎

獻弟融字奉業汝陰太守

融弟肅字奉誠中書博士遵少不拘小節長更修改太和  
和中例降爲侯景明中除相州魏郡太守還爲太尉諮  
議參軍年七十志力不衰嘗經篤疾幾死見神明救免  
言是福門之子當享長年延昌三年遷司農少卿尋拜  
龍驤將軍洛州刺史遵招誘有方蕭衍新化太守杜性  
新化令杜龍振平陽令杜臺定等率戶三千據地內附  
熙平元年七月卒年七十六贈平東將軍兗州刺史諡

曰惠侯有子十三人

長子楷字景伯州舉秀才早卒

子冲字文助在儒林傳

楷弟尚字景勝本州治中早卒

尚弟整字景智少有大度頗涉書史郡功曹太和十五年奉朝請高祖都洛親自臨選除司空法曹參軍高祖南討以廣陽王嘉鎮荊州整爲嘉外兵參軍事尋轉太尉咸陽王禧外兵參軍景明中除給事中領本州中正尋除尚書左中兵郎中正始中蕭衍江州刺史王茂先來寇南境平南將軍楊大眼討之詔整持節爲大眼軍

司大破茂先斬衍輔國將軍王花等永平初以軍功除員外散騎常侍仍除郎中延昌三年秋世宗親選百官於朝堂拜右軍將軍仍除郎中尋轉驍騎將軍未幾丁父憂相州刺史山陽王熙在鄴起兵將誅元乂等事敗傳首京師熙之親故莫敢視整弟婦卽熙姊遂收其屍藏之後乃還熙所親乂聞而致憾因以熙弟略南走蕭衍誣整將叛送整與弟宜及子恭等幽繫之賴御史王基前軍將檢事使魏子建理雪獲免後自征虜將軍出除范陽太守時已兵亂整郡獲全去郡之後尋被陷沒靈太后反政除安南將軍光祿大夫元略曾於整坐泣

謂黃門王誦尚書袁翻曰刁公收歛我家卿等宜知整  
以母老河北喪亂時整族弟雙爲西兗州刺史整遂攜  
家依焉永安初拜金紫光祿大夫二年兼黃門元顥入  
洛用爲滄州刺史莊帝還朝坐免官後歸鄉里及莊帝  
殺爾朱榮就除鎮東將軍行滄州事普泰初假征東大  
將軍滄冀瀛三州刺史大都督將軍如前尋加車騎將  
軍右光祿大夫逢本鄉賊亂奉母客於齊州加衛大將  
軍天平四年卒於鄴贈司空公諡曰文獻整解音律輕  
財好施交結名勝聲酒自娛然貪而好色爲議者所貶  
初雍與從弟寶惠俱入國



寶惠字道明太祖以爲上客卒有六子

子連城爲冀州開府椽刁氏世有榮祿而門風不甚修  
潔爲時所鄙

雍族孫雙字子山高祖藪晉齊郡太守藪因晉亂居青  
州之樂安父道覆皇興初除平原太守至雙始還本鄉  
雙少好學兼涉文史雅爲中山王英所知賞拜西河太  
守正光初中山王熙之誅也熙弟略投命於雙雙護之  
周年時購略甚切略乃謂雙曰我兄弟屠滅已盡唯我  
一身漏刃相託卿雖厚恩久見容蔽但事留變生終恐  
難保脫萬一發覺我死分也無事相累卿若送吾出境

便是再生之惠如其不爾輒欲自裁雙曰人生會有一死死所難遇耳今遭知己視死如歸願不以爲慮略後苦求南轉雙乃遣從子昌送達江左靈太后返政知略因雙獲免徵拜光祿大夫時略姊饒安公主刁宣妻也頻訴靈太后乞徵略還朝廷乃以徐州所獲俘江革祖暉二人易之以雙與略有舊乃令至境迎接略肅宗末除西兗州刺史時賊盜蜂起州人張桃弓等招聚亡命公行劫掠雙至境先遣使諭桃弓陳示禍福桃弓卽隨使歸罪雙捨而不問後有盜發之處令桃弓追捕咸悉擒獲於是州境清肅莊帝初行濟州刺史以功封曲城

鄉男出帝初遷驃騎大將軍左光祿大夫興和三年卒  
贈車騎大將軍儀同三司齊州刺史諡曰清穆

王慧龍自云太原晉陽人司馬德宗尚書僕射愉之孫  
散騎侍郎緝之子也幼聰慧愉以爲諸孫之龍故名焉  
初劉裕微時愉不爲禮及得志愉合家見誅慧龍年十  
四爲沙門僧彬所匿百餘日將慧龍過江爲津人所疑  
曰行意怱怱傍徨得非王氏諸子乎僧彬曰貧道從師  
有年止西岸今暫欲定省還期無遠此隨吾受業者何  
至如君言旣濟遂西上江陵依叔祖忱故吏荊州前治  
中習辟疆時刺史魏詠之卒辟疆與江陵令羅脩前別

駕劉期公土人王騰等謀舉兵推慧龍爲盟主剋日襲州城而劉裕聞詠之卒亦懼江陵有變遣其弟道規爲荊州衆遂不果羅脩將慧龍又與僧彬北詣襄陽司馬德宗雍州刺史魯宗之資給慧龍送渡江遂自虎牢奔于姚興其自言也如此泰常二年姚泓滅慧龍歸國太宗引見與言慧龍請効力南討言終俯而流涕天子爲之動容謂曰朕方混一車書席卷吳會卿情計如此豈不能相資以衆乎然亦未之用後拜洛城鎮將配兵三千人鎮金墉旣拜十餘日太宗崩世祖初卽位咸謂南人不宜委以師旅之任遂停前授初崔浩弟恬聞慧龍

王氏子以女妻之浩旣婚姻及見慧龍曰信王家兒也  
王氏世鱸鼻江東謂之鱸王慧龍鼻大浩曰真貴種矣  
數向諸公稱其美司徒長孫嵩聞之不悅言於世祖以  
其嘆服南人則有訕鄙國化之意世祖怒召浩責之浩  
免冠陳謝得釋及魯宗之子軌奔姚興後歸國云慧龍  
是王愉家豎僧彬所通生也浩雖聞之以女之故成贊  
其族慧龍由是不調久之除樂安王範傳領并荆揚三  
州大中正慧龍抗表願得南垂自効崔浩固言之乃授  
南蠻校尉安南大將軍左長史及劉義隆荊州刺史謝  
晦起兵江陵引慧龍爲援慧龍督司馬盧壽等一萬人

拔其思陵戍進圍項城晦敗乃班師後劉義隆將王玄謨寇滑臺詔假慧龍楚兵將軍與安頡等同討之相持五十餘日諸將以賊盛莫敢先慧龍設奇兵大破之世祖賜以劔馬錢帛授龍驤將軍賜爵長社侯拜滎陽太守仍領長史在任十年農戰並修大著聲績招攜邊遠歸附者萬餘家號爲善政其後劉義隆將到彥之檀道濟等頻頓淮潁大相侵掠慧龍力戰屢摧其鋒彥之與友人蕭斌書曰魯軌顏鈍馬楚麤狂亡人之中唯王慧龍及韓延之可爲深憚不意儒生懦夫乃令老子訝之劉義隆縱反間云慧龍自以功高而位不至欲引寇入

邊因執安南大將軍司馬楚之以叛世祖聞曰此必不  
然是齊人忌樂毅耳乃賜慧龍璽書曰義隆畏將軍如  
虎欲相中害朕自知之風塵之言想不足介意也劉義  
隆計旣不行復遣刺客呂玄伯購慧龍首二百戶男絹  
一千疋玄伯僞爲反間來求屏人有所論慧龍疑之使  
人探其懷有尺刀玄伯叩頭請死慧龍曰各爲其主也  
吾不忍害此人左右皆言義隆賊心未已不殺玄伯無  
以制將來慧龍曰死生有命彼亦安能害我且吾方以  
仁義爲干鹵又何憂乎刺客遂捨之時人服其寬恕慧  
龍自以遭難流離常懷憂悴乃作祭伍子胥文以寄意

焉生一男一女遂絕房室布衣蔬食不參吉事舉動必以禮太子少傅游雅言於朝曰慧龍古之遺孝也撰帝王制度十八篇號曰國典真君元年拜使持節寧南將軍虎牢鎮都副將未至鎮而卒臨沒謂功曹鄭曄曰吾羈旅南人恩非舊結蒙聖朝殊特之慈得在疆場効命誓願鞭屍吳市戮墳江陰不謂嬰此重疾有心莫遂非唯仰愧國靈實亦俯慙后土修短命也夫復何言身歿後乞葬河內州縣之東鄉依古墓而不墳足藏髮齒而已庶魂而有知猶希結草之報時制南人入國者皆葬桑乾曄等申遺意詔許之贈安南將軍荊州刺史謚穆



侯吏人及將士共於墓所起佛寺圖慧龍及僧彬象讚  
之呂玄伯感全省之恩留守墓側終身不去

子寶興襲爵

寶興少孤事母至孝尚書盧遐妻崔浩女也初寶興母  
及遐妻俱孕浩謂曰汝等將來所生皆我之自出可指  
腹爲親及婚浩爲撰儀躬自監視謂諸客曰此家禮事  
宜盡其美及浩被誅盧遐後妻寶興從母也緣坐沒官  
寶興亦逃避未幾得出盧遐妻時官賜度河鎮高車滑  
骨寶興盡賣貨產自出塞贖之以歸州辟治中從事別  
駕舉秀才皆不就閉門不交人事襲爵長社侯龍驤將

軍卒子瓊襲爵

瓊字世珍高祖賜名焉太和九年爲典寺令十六年降侯爲伯高祖納其長女爲嬪拜前軍將軍并州太中正正始中爲光州刺史有受納之響爲中尉王顯所劾終得雪免神龜中除左將軍兗州刺史去州歸京多年沉滯所居在司空劉騰宅西騰雖勢傾朝野初不候之騰旣權重吞并隣宅增廣舊居唯瓊終不肯與以此久見抑屈瓊女適范陽盧道亮不聽歸其夫家及女卒哀慟無已瓊仍葬之別所冢不卽塞常於壙內哭泣久之乃掩當時深恠疑其穢行加以孽疾每見道俗乞丐無已

造次見之令人笑愕道逢太保廣平王懷據鞍抗禮自言馬瘦懷卽以誕馬并乘具與之嘗詣尚書令李崇騎馬至其黃閣見崇子世哲直問繼伯在否崇趨出瓊乃下崇儉而好以紙帖衣領瓊哂而掣去之崇小子青肫嘗盛服闕寵勢亦不足恨領軍元義使奴遺瓊馬并留奴王誦聞之笑曰東海之風於茲墜矣孝昌三年除鎮東將軍金紫光祿大夫中書令時瓊子遵業爲黃門郎故有此授卒年七十四贈征北將軍中書監并州刺史自慧龍入國三世一身至瓊始有四子

長子遵業風儀清秀涉歷經史位著作佐郎與司徒左

長史崔鴻同撰起居注遷右軍將軍兼散騎常侍慰勞  
蠕蠕乃詣代京採拾遺文以補起居所闕與崔光安豐  
王延明等參定服章及光爲肅宗講孝經遵業預講延  
明錄義並應詔作釋奠侍宴詩時人語曰英英濟濟王  
家兄弟轉司徒左長史黃門郎監典儀注遵業有譽當  
時與中書令陳郡袁翻尚書瑯琊王誦並領黃門郎號  
曰三哲時政歸門下世謂侍中黃門爲小宰相而遵業  
從容恬素若處丘園嘗著穿角履好事者多毀新履以  
學之以胡太后臨朝天下方亂謀避地自求徐州太后  
曰王誦罷幽州始作黃門卿何乃欲徐州更待一二年

當有好處分遵業兄弟並交遊時俊乃爲當時所美及爾朱榮入洛兄弟在父喪中以於莊帝有從姨兄弟之親相率奉迎俱見害河陰議者惜其人才而譏其躁競贈并州刺史著三晉記十卷

遵業子松年尚書庫部郎

韓延之字顯宗南陽赭陽人魏司徒暨之後也司馬德宗平西府錄事參軍劉裕率伐司馬休之未至江陵密使與延之書招之延之報曰聞親率戎馬遠履西畿闔境士庶莫不怪駭何者莫知師出之名故也司馬平西體國忠貞欵愛待物當於古人中求耳劉裕足下海內

之人誰不見足下此心而復欲欺誑國士天地所不容  
在彼不在此矣今伐人之君陷人以利真可謂處懷期  
物自有由來者矣以平西之至德寧無授命之臣乎假  
令天長喪亂九流渾濁當與臧洪遊於地下不復多言  
裕得書歎息以示諸佐曰事人當應如此劉裕父名翹  
字顯宗於是延之字顯宗名子爲翹蓋示不臣劉氏也  
後奔姚興泰常二年與司馬文思來入國以延之爲虎  
牢鎮將爵魯陽侯初延之曾來往栢谷塢省魯宗之墓  
有終焉之志因謂子孫云河洛三代所都必有治於此  
者我死不勞向北代葬也卽可就此及卒子從其言遂

葬於宗之墓次延之死後五十餘年而高祖徙都其孫  
卽居於墓北栢谷塢延之前妻羅氏生子措措隨父入  
國又以淮南王女妻延之生道仁措推道仁爲嫡襲父  
爵位至殿中尚書進爵西平公

袁式字季祖陳郡陽夏人漢司徒滂之後父淵司馬昌  
明侍中式在南歷武陵王遵諮議參軍與司馬文思等  
歸姚興泰常二年歸國爲上客賜爵陽夏子與司徒崔  
浩一而便盡國士之交是時朝儀典章悉出於浩浩以  
式博於古事每所草創恒顧訪之性長者雖羈旅廳泊  
而清貧守度不失士節時人甚敬重之皆呼曰袁諮議

延和三年衛大將軍樂安王範爲雍州刺史詔式與中書侍郎高允俱爲從事郎中辭而獲免式沉靖樂道周覽書傳至於詁訓倉雅偏所留懷作字釋未就以天安二年卒贈豫州刺史諡肅侯

子濟襲位魏郡太守政有清稱加寧遠將軍子姪遂居潁川之陽夏

史臣曰刁雍才識恢遠著聲立事禮遇優隆世有人爵堂構之義也王慧龍援難自歸頗歷夷險撫人督衆見憚嚴敵世珍實有令子克播家聲韓延之報書劉裕國體在焉袁式贊禮儀崔浩時稱長者一時有稱信爲美



哉

魏書卷二十八

魏書卷三十八考證

刁雍傳山陽王熙在鄴起兵○本書南安王楨子英世  
宗時改封中山王英子熙延昌二年襲爵尋授相州  
刺史卽起兵上表此處作山陽王亦互異

魏書卷三十八考證

魏書卷三十九

齊

魏

收

撰

列傳第二十七

李寶

李寶字懷素小字衍孫隴西狄道人私署涼王暕之孫也父翻字士舉小字武彊私署驍騎將軍祁連酒泉晉昌三郡太守寶沉雅有度量驍勇善撫接伯父歆爲沮渠蒙遜所滅寶徙於姑臧歲餘隨舅唐契北奔伊吾臣於蠕蠕其遺民歸附者稍至二千寶傾身禮接甚得其心衆皆樂爲用每希報雪屬世祖遣將討沮渠無諱於

敦煌無諱捐城遁走寶自伊吾南歸敦煌遂修繕城府  
規復先業遣弟懷達奉表歸誠世祖嘉其忠款拜懷達  
散騎常侍敦煌太守別遣使授寶使持節侍中都督西  
垂諸軍事鎮西大將軍開府儀同三司領護西戎校尉  
沙州牧敦煌公仍鎮敦煌四品以下聽承制假授真君  
五年因入朝遂留京師拜外都大官轉鎮南將軍并州  
刺史還除內都大官高宗初代司馬文思鎮懷荒改授  
鎮北將軍太安五年薨年五十三詔賜命服一襲贈以  
本官諡曰宣有六子承茂輔佐公業沖公業早卒沖別  
有傳

承字伯業少有策畧初寶欲謀歸款民僚多有異議承時年十三勸寶速定大計於是遂決仍令承隨表入質世祖深相器異禮遇甚優賜爵姑臧侯後遭父憂居喪以孝聞承應傳先封以自有爵乃讓弟茂時論多之承方裕有鑒裁爲時所重高宗末以姑臧侯出爲龍驤將軍滎陽太守爲政嚴明甚著聲稱延興五年卒時年四十五贈使持節本將軍雍州刺史諡曰穆

長子韶字元伯學涉有器量與弟彥虔蕤並爲高祖賜名焉韶又爲季父沖所知重延興中補中書學生襲爵姑臧侯除儀曹令時修改車服及羽儀制度皆令韶典

焉遷給事黃門侍郎後例降侯爲伯兼大鴻臚卿黃門如故高祖將創遷都之計詔引侍臣訪以古事詔對洛陽九鼎舊所七百攸基地則土中實均朝貢惟王建國莫尚於此高祖稱善遷太子右詹事尋罷左右仍爲詹事秦州大中正出爲安東將軍兗州刺史高祖自鄴還洛韶朝於路言及庶人恂事高祖曰卿若不出東宮或未至此世宗初徵拜侍中領七兵尚書尋除撫軍將軍并州刺史以從弟伯尚同元禧之逆在州禁止徵還京師雖不知謀猶坐功親免除官爵久之起兼將作大匠勅叅定朝儀律令呂苟兒反於秦州除撫軍將軍西道

都督行秦州事與右衛將軍元麗率衆討之事平卽眞  
璽書勞勉復其先爵時隴右新經師旅之後百姓多不  
安業韶善撫納甚得夷夏之心徵還行定州事尋轉相  
州刺史將軍如故肅宗初入爲殿中尚書行雍州事後  
除中軍大將軍吏部尚書加散騎常侍韶在選曹不能  
平心守正通容而已議者貶之出爲冀州刺史清簡愛  
民甚收名譽政績之美聲冠當時肅宗嘉之就加散騎  
常侍遷車騎大將軍賜劍佩貂蟬各一具驍騮馬一匹  
并衣服寢具韶以年及懸車抗表遜位優旨不許轉定  
州刺史常侍如故及赴中山冀州父老皆送出西境相



聚而泣二州境既連接百姓素聞風德州內大治正光五年四月卒於官年七十二詔贈帛七百疋贈侍中持節散騎常侍車騎大將軍司空公雍州刺史諡曰文恭既葬之後有冀州兵千餘人戍於荊州還經詔墓相率培冢數日方歸其遺愛如此初詔克定秦隴永安中追封安城縣開國伯邑四百戶

長子璵字道璠襲武定中驃騎大將軍東徐州刺史

璵弟瑾字道瑜美容貌頗有才學特爲詔所鍾愛清河王懌知賞之懌爲司徒辟叅軍轉著作佐郎加龍驤將軍稍遷通直散騎侍郎與給事黃門侍郎王遵業尚書

郎盧觀典領儀注臨淮王或謂瑾等曰卿等三儁共掌  
帝儀可謂舅甥之國士盧卽瑾之外兄也肅宗崩上諡  
策文瑾所制也莊帝初於河陰遇害年四十九贈冠軍  
將軍齊州刺史

長子產之字孫僑容貌短陋而撫訓諸弟愛友篤至年  
四十九亡

產之弟構之武定末司空主簿

瑾弟瓚字道璋少有風尚辟司徒叅軍事神龜中卒贈  
漢陽太守

子修年大將軍開府士曹叅軍早亡

韶弟彥字次仲頗有學業高祖初舉司州秀才除中書  
博士轉諫議大夫後因考課降爲元士尋行主客曹事  
徙郊廟下大夫時朝儀典章咸未周備彥留心考定號  
爲稱職高祖南伐彥以蕞爾江閩不足親勞鑿駕頻有  
表諫雖不從納然亦嘉其至誠及六軍次於淮南徵爲  
廣陵王羽長史加恢武將軍西翼副將軍還除冀州趙  
郡王幹長史轉青州廣陵王羽長史帶齊郡太守徵爲  
龍驤將軍司徒右長史轉左長史秦州大中正出行揚  
州事尋徵拜河南尹還至汝陰復勅行徐州事轉平北  
將軍平州刺史還平東將軍徐州刺史延昌二年夏大

霖雨川瀆皆溢彥相水陸形勢隨便疏通得無淹漬之  
害朝廷嘉之頻詔勞勉入爲河南尹遷金紫光祿大夫  
光祿勳卿轉度支尚書出爲撫軍將軍秦州刺史是時  
破落汗拔陵等反於北鎮二夏幽涼所在蜂起而彥刑  
政過猛爲下所怨城民薛珍劉慶杜超等因四方離叛  
遂潛結逆謀正光五年六月突入州門擒彥於內齋囚  
於西府推其黨莫折大提爲帥遂害彥永安中追贈侍  
中驃騎大將軍司徒公雍州刺史諡曰孝貞  
子燮字德諧少有風望解褐司徒叅軍著作佐郎司徒  
祭酒轉主簿卒贈輔國將軍太常少卿

變弟德廣終於中散大夫

德廣弟德顯太尉行叅軍稍遷散騎侍郎卒贈征虜將軍東秦州刺史

德顯弟德明祕書郎

彥弟虔字叔恭太和初爲中書學生遷祕書中散轉冀州驃騎府長史太子中舍人世宗初遷太尉從事中郎出爲清河太守屬京兆王愉反虔棄郡奔闕世宗聞虔至謂左右曰李虔在冀州日久恩信著物今拔難而來衆情自解矣乃授虔別領軍前慰勞事事平轉長樂太守延昌初冀州大乘賊起令虔以本官爲別將與都督

元遙討平之遷後將軍燕州刺史還爲光祿大夫加平西將軍兼大司農卿出爲散騎常侍安東將軍兗州刺史追論平冀州之功賜爵高平男還京除河南邑中正遷鎮軍將軍金紫光祿大夫孝莊初授特進車騎大將軍儀同三司加散騎常侍又進號驃騎大將軍開府儀同三司永安三年冬薨年七十四贈侍中都督冀定瀛三州諸軍事驃騎大將軍太尉公冀州刺史男如故諡曰宣景

長子暉字仁明解褐司空行叅軍稍遷尚書左外兵郎孝莊初於河陰遇害年四十贈安東將軍度支尚書青

州刺史

子褒武定中太師法曹叅軍

暉弟昞字仁曜起家高陽王雍常侍員外散騎侍郎太尉錄事叅軍孝莊初與兄暉同時遇害年四十八贈散騎常侍左將軍兗州刺史

子爲武定中司空長流叅軍

昞弟昭字仁照卒於散騎侍郎贈征虜將軍涼州刺史子士元操武定中竝儀同開府叅軍事

昭弟曉字仁畧武定末太尉諮議叅軍

虔弟蕤字延賓歷步兵校尉東郡太守司農少卿卒贈

龍驤將軍豫州刺史

長子詠字義興有幹局起家太學博士領殿中侍御史  
稍遷東郡太守莊帝初遷安東將軍濟州刺史轉廣州  
刺史加散騎常侍前廢帝時與第三弟通直散騎常侍  
義真第七弟中書侍郎太常少卿義邕同時爲爾朱仲  
遠所害義邕莊帝居蕃之日以外親甚見親昵及有天  
下特蒙信任爾朱榮之誅義邕與其事由是竝及於禍  
出帝初贈詠侍中驍騎將軍吏部尚書冀州刺史義真  
贈前將軍齊州刺史義邕贈安東將軍青州刺史  
詠次弟義慎司空屬第四弟義遠國子博士莊帝初竝



於河陰遇害義慎贈散騎常侍征東將軍雍州刺史

承弟茂字仲宗高宗末襲父爵鎮西將軍敦煌公高祖  
初除長安鎮都將轉西兗州刺史將軍如故入爲光祿  
大夫例降爲侯茂性謙慎以弟沖寵盛懼於盈遂託以  
老疾固請遜位高祖不奪其志聽食大夫祿還私第因  
居定州之中山自是優遊早舍不入京師景明三年卒  
時年七十一諡曰恭侯

子靜字紹安襲解褐太尉叅軍事定州別駕東平原太  
守神龜三年卒年五十五

子遐字智遠有几案才起家司空行叅軍襲爵稍遷右

將軍尚書駕部郎中出爲河內太守爾朱榮稱兵向洛次其郡境莊帝潛濟河北相會遐旣聞榮推奉莊帝遂開門謁候仍從駕南渡及河陰爲亂兵所害時年四十二事寧追贈散騎常侍車騎大將軍尚書右僕射秦州刺史以候駕之功封盧鄉縣開國伯邑三百戶

子孝儒襲齊受禪爵例降

靜弟孚字仲安恭順篤厚起家鎮北府公曹叅軍定州別駕汝陽汝南中山三郡太守孝莊初以外親超授撫軍將軍金紫光祿大夫出除鎮東將軍滄州刺史加散騎常侍普泰元年卒年六十二有五子

長子惠昭太傅開府城局叅軍

惠昭弟惠謨武定中齊州別駕

孚弟敬安奉朝請早亡

敬安弟季安粗涉書史解褐彭城王行叅軍稍遷寧朔將軍步兵校尉出爲徐州北海王顥撫軍府長史正光末顥爲關西都督復引爲長史委以戎政尋加驍騎將軍孝昌三年卒於軍時年五十三贈征虜將軍涼州刺史

子處默少清惠起家青州彭城王府主簿稍遷通直散騎常侍安東將軍光祿大夫撫軍將軍廣州開府長史

天平初卒年三十九

茂弟輔字督真亦有人望解褐中書博士遷司徒議曹掾太和初高祖爲咸陽王禧納其女爲妃除鎮遠將軍潁川太守帶長社戍輔綏懷招集甚得邊和六年卒於郡年四十七贈征虜將軍秦州刺史襄武侯謚曰惠

長子伯尚少有重名弱冠除祕書郎高祖每云此李氏之千里駒稍遷通直散騎侍郎勅撰太和起居注尋遷祕書丞世宗初兼給事黃門侍郎景明二年坐與咸陽王禧謀反誅時年二十九

伯尚弟仲尚儀貌甚美少以文學知名二十著前漢功

臣序讚及季父司空沖誅時兼侍中高聰尚書邢巒見而歎曰後生可畏非虛言也起家京兆王愉行叅軍景明中坐兄事賜死年二十五

仲尚弟季凱沉敏有識量坐兄事與母弟俱徙邊久之會赦免遂寓居於晉陽沉廢積年孝昌中解褐太尉叅軍事加威遠將軍尋除并州安北府長史肅宗崩爾朱榮陰圖義舉季凱豫謀莊帝踐阼徵拜給事黃門侍郎封博平縣開國侯邑七百戶尋加散騎常侍東平將軍轉祕書監進號中軍將軍普泰元年七月爾朱世隆以榮之死謂季凱通知於是見害年五十五出帝初追贈

侍中驃騎將軍吏部尚書定州刺史

子統字基伯襲武定末太尉刑獄叅軍齊受禪爵例降  
季凱弟延慶孝昌中解褐定州鎮北城局叅軍稍遷奉  
車都尉陳留太守遷鎮東將軍金紫光祿大夫永熙二  
年卒年五十二贈本將軍雍州刺史

子惠矩武定中儀同開府叅軍事

延慶弟延度武定中衛將軍安德太守

輔弟佐字季翼有文武才幹高祖初兼散騎常侍銜命  
使高麗以奉使稱旨還拜常山太守賜爵真定子遷冠  
軍將軍懷州刺史賜爵山陽侯尋加安南將軍河內公

轉安東將軍相州刺史所在有稱績車駕南討拜安南將軍副大司馬咸陽王禧爲殿中將軍尋被勅與征南將軍城陽王鸞安南將軍盧淵等軍攻赭陽各不相節度諸軍皆坐甲城下欲以不戰降賊佐獨勒所部晨夜攻擊屬蕭鸞遣其太子右衛率垣歷生率衆來援咸以勢弱不敵規欲班師佐乃簡騎二千逆賊爲賊所敗坐徙瀛州爲民車駕征宛鄧復起佐假平遠將軍統軍蕭鸞新野太守劉忌憑城固守佐率所領攻拔之以功封涇陽縣開國子邑三百戶沔北旣平廣陽王嘉爲荊州刺史仍以佐爲嘉鎮南府長史加輔國將軍別鎮新野

及大軍凱旋高祖執佐手曰沔北洛陽南門卿旣爲朕平之亦當爲朕善守高祖崩遺勅以佐行荊州事仍本將軍佐在州威信大行邊民悅附前後歸之者二萬許家尋正刺史世宗初徵兼都官尚書景明二年卒年七十一贈征虜將軍秦州刺史諡曰莊子遵襲

遵爽儁有父風歷相州治中轉別駕冀州征北府長史司空司馬卒贈龍驤將軍洛州刺史孝莊初以外戚超贈車騎大將軍儀同三司定州刺史

子果襲司空諮議叅軍武定中坐通西賊伏誅

遵弟柬字休賢郡辟功曹以父憂去職遂終身不食酒



肉因屏居鄉里肅宗初司空任城王澄嘉其操尚以爲  
叅軍事尋轉司徒外兵叅軍歷任城濟北二郡太守孝  
莊初遷鎮遠將軍濟州刺史卒贈安北將軍殿中尚書  
相州刺史

子經司徒諮議叅軍行豫州事興和初坐妖言賜死

東弟神儁小名提少以才學知名爲太常劉芳所賞釋  
褐奉朝請轉司徒祭酒從事中郎頃之拜驍騎將軍中  
書侍郎太常少卿出爲前將軍荊州刺史時四方多事  
所在連兵蕭衍遣將曹敬宗來寇攻圍積時又引水灌  
城城不沒者數版神儁循撫兵民戮力固守詔遣都督

崔暹別將王羆裴衍等赴援敬宗退走時寇賊之後城外多有露骸神儁教令收葬之徵拜大司農卿肅宗末除鎮軍將軍行相州事於時葛榮南逼神儁憂懼乃故墜馬傷脚仍停汲郡有詔追還莊帝纂統以神儁外戚之望拜散騎常侍殿中尚書追論固守荊州之功封千乘縣開國侯邑一千戶轉中書監吏部尚書神儁意尚風流情在推引人物而不能守正奉公無多聲譽有鉅鹿人李炎上書言神儁之失天柱將軍爾朱榮曾補人爲曲陽縣令神儁以階縣不用榮聞大怒謂神儁自樹親黨排抑勲人神儁懼啓求解官乃除衛將軍左光祿

大夫等屬爾朱兆入京乘輿幽執神儁遂逃竄民間出  
帝初始來歸闕拜散騎常侍驃騎大將軍左光祿大夫  
儀同三司孝靜初行并州事尋除驃騎大將軍肆州刺  
史入爲侍中興和二年薨年六十四贈都督雍秦涇三  
州諸軍事驃騎大將軍尚書左僕射司徒公雍州刺史  
侍中開國公如故神儁風韻秀舉博學多聞朝廷舊章  
及人倫氏族多所諳記篤好文雅老而不輟凡所交遊  
皆一時名士汲引後生爲其光價四方才子咸宗附之  
而性通率不持檢度至於少年之徒皆與褻狎不能清  
正方重識者以此爲譏神儁喪二妻又欲娶鄭嚴祖妹

神儁之從甥也盧元明亦將爲婚遂至紛競二家閱於嚴祖之門鄭卒歸元明神儁惆悵不已時人謂神儁鳳德之衰神儁無子從弟延度以第三子容兒後之

詔從弟元珍小名大墨起家奉朝請太尉錄事叅軍卒於步兵校尉

元珍弟仲遵有業尚彭城王勰爲定州請爲開府叅軍累轉員外散騎常侍遊擊將軍太中大夫出爲京兆內史大將軍京兆王繼西伐請而諮議叅軍尋除左將軍營州刺史時四方州鎮謀逆叛亂相續營州城內咸有異心仲遵單車赴州旣至與大使盧同以恩信懷誘率

皆怡悅後肅宗又詔盧同爲行臺北出慰勞同疑彼人情難信聚兵將往城民劉安定等先有異志謂欲圖已還相恐動遂執仲遵二子清石阿罕尋亦見殺唯兄子徽仁得免

韶從叔思穆字叔仁父抗自涼州渡江左仕劉駿歷晉壽安東東萊三郡太守思穆有度量善談論工草隸爲當時所稱太和十七年攜家累自漢中歸國除步兵校尉遭母憂解任起爲都水使者及車駕南伐以本官兼直閣將軍從平南陽以功賜爵爲伯尋除司徒司馬彭城王勰爲定州請爲司馬帶鉅鹿太守勰徙鎮揚州仍

請爲司馬府解除征虜將軍太中大夫出爲京兆內史  
在郡八年頗有政績徵拜光祿大夫肅宗初除平北將  
軍中山太守未拜遷安北將軍營州刺史卒於位時年  
六十一贈安西將軍華州刺史永安中子獎爲莊帝所  
親待復超贈思穆衛將軍中書監左光祿大夫諡曰宣  
惠有子十四人

嫡子斌襲官至散騎侍郎早卒

斌兄獎武定末司徒左長史李氏自初入魏人位兼舉  
因冲寵遇遂爲當世盛門而仁義吉凶情禮淺薄暮功  
之服殆無慘容相視窘乏不加拯濟識者以此貶之

史臣曰李寶家難流離晚獲歸正大享名器世業不殞  
諸子承基俱有位望韶清身履度聲績洽美矣神儁才  
尚風流殆民望也貞粹之地君子或未許焉

魏書卷三十九考證

李寶傳隨舅唐契北奔伊吾○唐監本誤廣各本同考  
本書唐和傳和與兄契携外甥李寶避難伊吾北史  
亦云携其甥武昭王孫寶臣於蠕蠕乃諸本俱作廣  
契傳寫之謬也今改正

年四十○

臣人龍

按曖弟晒傳云孝莊初與兄曖同時

遇害年四十八曖旣晒兄矣反年四十耶二者必有  
一誤

請而諮議參軍○而當作爲



魏書卷三十九考證

魏書卷四十

齊

魏

收

撰

列傳第二十八

陸俟

陸俟代人也曾祖幹祖引世領部落父突太祖時率部  
民隨從征伐數有戰功拜厲威將軍離石鎮將天興中  
爲上黨太守關內侯俟少聰慧有策略太宗踐阼拜侍  
郎遷內侍襲爵關內侯轉龍驤將軍給事典選部蘭  
臺事當官而行無所屈撓世祖親征赫連昌詔俟督諸  
軍鎮大磧以備蠕蠕車駕還復典選部蘭臺事與西平

公安頡督諸軍攻虎牢剋之賜爵建業公拜冀州刺史  
仍本將軍時考州郡治功唯俟與河內太守丘陳爲天  
下第一轉都督洛豫二州諸軍事本將軍虎牢鎮大將  
平涼休屠金崖羌狄子玉等叛復轉爲使持節散騎常  
侍平西將軍安定鎮大將旣至懷柔羌戎莫不歸附追  
討崖等皆獲之徵還拜散騎常侍出爲平東將軍懷荒  
鎮大將未朞諸高車莫弗訖訟俟嚴急待下無恩還請  
前鎮將郎孤世祖詔許之徵俟還京旣至朝見言於世  
祖曰陛下今以郎孤復鎮以臣愚量不過周年孤身必  
敗高車必叛世祖疑謂不實切責之以公歸第明年諸

莫弗果殺郎孤而叛世祖聞之大驚卽召俟問其知敗之意俟曰夫高車上下無禮無禮之人難爲其上臣所以莅之以威嚴節之以憲網欲漸加訓導使知分限而惡直醜正實繁有徒故訟臣無恩稱孤之美孤獲還鎮欣其名譽必加恩於百姓譏臣爲失專欲以寬惠治之仁恕待之無禮之人易生陵傲不過朞年無復上下然後收之以威則人懷怨懟怨懟旣多敗亂彰矣世祖笑曰卿身乃短慮何長也卽日復除散騎常侍世祖征蠕蠕破涼州常隨駕別督輜重又與高涼王那渡河南略地至濟南東平陵徙其民六千家於河北又以俟都督

秦雍二州諸軍事平西將軍長安鎮大將與高涼王那擊蓋吳於杏城大破之獲吳二叔諸將欲送京師侯獨不許曰夫長安一都險絕之士民多剛彊類乃非一清平之時仍多叛動今雖良民猶以爲懼況其黨與乎若不斬吳恐長安之變未已吳一身藏竄非其親信誰能獲之若停十萬之衆以追一人非上策也不如私許吳叔免其妻子使自追吳擒之必也諸將咸曰今來討賊旣破之獲其二叔唯吳一人何所復至侯曰吳之悖逾本自天性今若獲免必誑惑愚民稱王者不死妄相扇動爲患必大諸君不見毒蛇乎斷其頭猶能爲害況除

腹心疾而曰必遺其類其可乎諸將曰公言是也但得賊不殺更有所求遂去不返其如罪何俟曰此罪我與諸君當之高涼王那亦從俟計遂遣吳二叔與之期及吳叔不至諸將各咎於俟俟曰此未得其便耳必不背也後數日果斬吳以至皆如其言俟之明略獨決皆此類也遷內都大官安定盧永劉超等聚黨萬餘以叛世祖以俟威恩被於關中詔以本官加都督秦雍諸軍事鎮長安世祖曰秦川險絕奉化日近吏民未被恩德故頃年已來頗有叛動今超等恃險不順王命朕若以重兵與卿則超等必合而爲一據險拒戰未易攻也若以

輕兵與卿則不制矣今使卿以方略定之於是俟單馬之鎮超等聞之大欣以爲無能爲也旣至申揚威信示以成敗誘納超女外若姻親超猶自警初無降意俟乃率其帳下往見超觀其舉措設掩襲之計超使人逆曰三百人以外當以弓馬相待三百人以內當以酒食相供俟乃將二百騎詣超超設備甚嚴俟遂縱酒盡醉而還後謂將士曰超可取也乃密選精兵五百人陳國恩德激厲將士言至懇切士卒奮勇各曰以死從公必無二也遂僞獵而詣超與士卒約曰今會發機當以醉爲限俟於是詐醉上馬大呼手斬超首士卒應聲縱擊殺

傷千數遂平之世祖大悅徵俟還京師轉外都大官散騎常侍如故高宗踐阼以子麗有策立之勲拜俟征西大將軍進爵東平王太安四年薨年六十七諡曰成王有子十二人

長子馥多智有父風高宗見馥而悅之謂朝臣曰吾常歎其父智過其軀是復踰於父矣少爲內都下大夫奉上接下行止取與每能逆曉人意與其從事者無不愛之興安初賜爵聊城侯出爲散騎常侍安南將軍相州刺史假長廣公爲政清平抑彊扶弱州中有德宿老名望重者以友禮待之詢之政事責以方略如此者十人



號曰十善又簡取諸縣疆門百餘人以爲假子誘接殷  
勤賜以衣服令各歸家爲耳目於外於是發奸擿伏事  
無不驗百姓以爲神明無敢劫盜者在州七年家至貧  
約徵爲散騎常侍民乞留馥者千餘人顯祖不許謂羣  
臣曰馥之善政雖復古人何以加之賜絹五百疋奴婢  
十口馥之還也吏民大歛布帛以遺之馥一皆不受民  
亦不取於是物造佛寺焉名長廣公寺後龔父爵改  
封建安王時劉彧司州刺史常珍奇以懸瓠內附而新  
民猶懷去就馥銜旨撫慰諸有陷軍爲奴婢者馥皆免  
之百姓忻悅民情乃定車駕討蠕蠕詔馥爲選部尚書

錄留臺事督兵運糧一委處分顯祖將禪位於京兆王子推任城王雲隴西王源賀等竝皆固諫馘抗言曰皇太子聖德承基四海屬望不可橫議干國之紀臣請劾頸殿庭有死無貳久之帝意乃解詔曰馘直臣也其能保吾子乎遂以馘爲太保與太尉源賀持節奉皇帝璽綬傳位於高祖延興四年薨贈以本官諡曰貞王馘有六子琇凱知名

琇字伯琳馘第五子母赫連氏身長七尺九寸甚有婦德馘有以爵傳琇之意琇年九歲馘謂之曰汝祖東平王有十二子我爲嫡長承襲家業今已年老屬汝幼沖

詎堪爲陸氏宗首乎琇對曰苟非鬪力何患童稚馘奇  
之遂立琇爲世子馘薨襲爵琇沉毅少言雅好讀書以  
功臣子孫爲侍御長給事中遷黃門侍郎轉太常少卿  
散騎常侍太子左詹事領北海王師光祿大夫轉祠部  
尚書司州大中正會從兄叡事免官景明初試守河內  
郡咸陽王禧謀反令子曇和與尹忤期薛繼祖等先據  
河內琇聞禧敗斬曇和首時以琇不先送曇和禧敗始  
斬首責其通情徵詣廷尉廷尉少卿崔振窮治罪狀按  
琇大逆陸宗大小咸見收捕會將赦先薨於獄琇弟凱  
仍上書訴寃世宗詔復琇爵

子景祚襲

凱字智君謹重好學年十七爲中書學生拜侍御中散轉通直散騎侍郎遷太子庶子給事黃門侍郎凱在樞要十餘年以忠厚見稱希言屢中高祖嘉之後遇患頻上書乞骸骨詔不許勅大醫給湯藥除正平太守在郡七年號爲良吏初高祖將議革變舊風大臣竝有難色又每引劉芳郭祚等密與規謨共論時政而國戚謂遂疎已怏怏有不平之色乃令凱私踰之曰至尊但欲廣知前事直當問其古式耳終無親彼而相疏也國戚舊人意乃稍解咸陽王禧謀逆凱兄琇陷罪凱亦被收遇

赦乃免凱痛兄之死哭無時節目幾失明訴寃不已備盡人事至正始初世宗復瑋官爵凱大喜置酒集諸親曰吾所以數年之中抱病恐死者顧門戶計耳逝者不追今願畢矣遂以其年卒贈龍驤將軍南青州刺史諡曰惠

長子暉字道暉與弟恭之竝有時譽洛陽令賈禎見其兄弟歎曰僕以老年更覩雙璧又嘗兄弟共候黃門郎孫惠蔚惠蔚謂諸賓曰不意二陸復在座隅吾德謝張公無以延譽暉起家司徒行參軍太尉西閣祭酒兼尚書右民三公郎坐事免後除伏波將軍正光中卒贈司

州治中孝昌中重贈冠軍將軍恒州刺史曄擬急就篇  
爲悟蒙章及七誘十醉章表數十篇曄與恭之晚不睦  
爲時所鄙

子元規武定中尚書郎

恭之字季順有操尚釋褐侍御史著作佐郎建義初除  
中書侍郎領著作郎尋除河北太守轉征虜將軍殷州  
刺史前廢帝初拜廷尉卿加鎮西將軍所歷竝有聲績  
後坐事免孝靜初還復本位出除征南將軍東荊州刺  
史天平四年卒贈散騎常侍衛將軍吏部尚書定州刺  
史謚曰懿恭之所著文章詩賦凡千餘篇

子曄開府中兵參軍

馭弟石跋涇州刺史

石跋弟歸東宮舍人駕部校尉

歸弟尼內侍校尉東陽鎮都將

尼弟麗少以忠謹入侍左右太武特親昵之舉動審慎而無愆失賜爵章安子稍遷南部尚書太武崩南安王余立既而爲中常侍宗愛等所殺百寮憂惶莫知所立麗以高宗世嫡之重民望所係乃首建大義與殿中尚書長孫渴侯尚書源賀羽林郎劉尼奉迎高宗於苑中立之社稷獲安麗之謀矣由是受心膺之任在朝者無

出其右與安初封平原王加撫軍將軍麗辭曰陛下以

一統之重承基繼業至於奉迎守順臣

闕二字

常豈敢昧

冒以干大典頻讓再三詔不聽麗乃啓曰臣父歷奉先朝忠勤著稱今年至西夕未登王爵臣叨荷寵榮於分已過愚款之情未申犬馬之効未展願裁過恩聽遂所請高宗曰朕爲天下主豈不能得二王封卿父子也乃以其父俟爲東平王麗尋遷侍中撫軍大將軍司徒公復其子孫賜妻妃號麗以優寵旣頻固辭不受高宗益重之領太子太傅麗好學愛士常以講習爲業其所待者皆篤行之流士多稱之性又至孝遭父憂毀瘠過禮



和平六年高宗崩先是麗療疾於代郡溫泉聞諱欲赴左右止之曰宮車晏駕王德望素重奸臣若疾民譽慮有不測之禍願少遲回朝廷寧靜然後奔赴猶爲未晚麗曰安有聞君父之喪方慮禍難不卽奔波者遂便馳赴乙渾尋擅朝政忌而害之初渾悖傲每爲不法麗數諍之由是見忌顯祖甚追惜麗諡曰簡王陪葬金陵高祖追錄先朝功臣以麗配饗廟庭麗二妻長曰杜氏次張氏長子定國杜氏所生次叡張氏所生

定國在襁抱高宗幸其第詔養宮內至於遊止常與顯祖同處年六歲爲中庶子及顯祖踐阼拜散騎常侍特

賜封東郡王加鎮南將軍定國以承父爵頻辭不許又求以父爵讓弟叡乃聽之俄遷侍中儀曹尚書轉殿中尚書前後大駕征巡每擢爲行臺錄都曹事超遷司空定國恃恩不循法度延興五年坐事免官爵爲兵太和初復除侍中鎮南將軍秦益二州刺史復王爵八年薨於州贈以本官諡曰莊王賜命服一襲

子昕之字慶始風望端雅襲爵例降爲公尚顯祖女常山公主拜駙馬都尉歷通直郎景明中以從叔琇罪免官尋以主婿除通直散騎常侍未幾遷司徒司馬加輔國將軍出爲兗州刺史尋進號安東將軍治有名績仍

除青州刺史在州著寬平之稱轉安北將軍相州刺史  
永平四年夏卒贈鎮東將軍冀州刺史諡曰惠初定國  
娶河東柳氏生子安保後納范陽盧度世女生昕之二  
室俱爲舊族而嫡妾不分定國亡後兩子爭襲父爵僕  
射李沖有寵於時與度世子泉婚親相好沖遂左右申  
助昕之由是承爵尚主職位赫奕安保沉廢貧賤不免  
飢寒昕之容貌柔謹高祖以其主壻特垂昵眷世宗時  
年未四十頻撫三蕃當世以此榮之昕之卒後母盧悼  
念過哀未幾而亡公主奉姑有孝稱神龜初與穆氏頓  
丘長公主竝爲女侍中又性不妬忌以昕之無子爲納

妾媵而皆育女公主有三女無男以昕之從兄希道第  
四子子彰爲後

子彰字明遠本名士沉年十六出後事公主盡禮丞相  
高陽王雍嘗言曰常山妹雖無男以子彰爲兒乃過自  
生矣正光中襲爵東郡公尋除散騎侍郎拜山陽太守  
莊帝卽位徵拜給事黃門侍郎子彰妻卽咸陽王禧女  
禧誅養於彭城王第莊帝親之略同諸姊建義初爾朱  
榮欲修舊事庶姓封王由是封子彰濮陽王食邑七百  
戶尋而詔罷仍復先爵除安西將軍洛州刺史還拜征  
東將軍金紫光祿大夫領廣平王贊開府諮議參軍事

天平中拜衛將軍潁州刺史以母憂去職元象中以本將軍除齊州刺史又加驃騎將軍行懷州事轉北豫州刺史仍除徐州刺史將軍竝如故一年歷三州當世榮之還朝除衛大將軍右光祿大夫又行瀛州事尋拜侍中復行滄州事進號驃騎大將軍行冀州事除侍讀兼七兵尚書行青州事子彰之爲州以聚斂爲事晚節修改自行青冀滄瀛甚有時譽加以虛已納物人敬愛之武定八年二月除中書監三月卒年五十四賻帛一百疋追贈都督青光齊三州諸軍軍事驃騎大將軍開府儀同三司青州刺史公如故諡曰文宣子彰崇好道術曾

嬰重疾藥中須桑螵蛸子彰不忍害物遂不服焉其仁恕如此教訓六子雅有法度

子昴武定中中書舍人

昴弟駿太子洗馬

駿弟杏尚書倉部郎

叡字思弼其母張氏字黃龍本恭宗宮人以賜麗生叡麗之亡也叡始十餘歲襲爵撫軍大將軍平原王沉雅好學折節下士年未二十時人便以宰輔許之娶徐州刺史博陵崔鑒女鑒謂所親云平原王才度不惡但恨其姓名殊爲重複時高祖未改其姓叡婚自東徐還經

於鄴見李彪甚敬悅之仍與俱趨京師以爲館客資給  
衣馬僮使待之甚厚爲北征都督拜北部長轉尚書加  
散騎常侍太和八年正月叡與隴西公元琛竝持節爲  
東西二道大使褒善罰惡聲稱聞於京師五月詔賜叡  
夏服一具後以叡爲北征都督擊蠕蠕大破之遷侍中  
都曹尚書時蠕蠕又犯塞詔叡率騎五千以討之蠕蠕  
遁走追至石磧擒其帥赤阿突等數百人而還加散騎  
常侍遷尚書左僕射領北部尚書十六年降五等之爵  
以麗勲著前朝封叡鉅鹿郡開國公食邑三百戶尋爲  
使持節鎮北大將軍與陽平王頤竝爲都督督領軍將

軍斛律桓等北征三道諸軍事步騎十萬以討蠕蠕

以下各賜衣物有差

闕二字

親幸城北訓誓羣帥除尚書

令衛將軍

闕

大破蠕蠕而還尋以母憂解令高祖將有

南伐之事以本官起之改授征南將軍獻固辭請終情  
禮詔曰叡猶執私痛致違往旨金革方馳何宜曲遂也

加領衛尉可重勅有司速令敦喻後除使持節都督恒

肆朔三州諸軍事本將軍恒州刺史行尚書令高祖大

考百官奪叡尚書令祿一周十九年叡表曰臣聞先天

有弗違之略後天有順時之見今蕭鸞盜有名目竊據

江左惡盈罪稔天人棄之取亂攻昧誠在茲日愚以長



江浩蕩彼之巨防可以德招難以力屈又南土昏霧暑  
氣鬱蒸師人經夏必多疾病而鼎遷草創庶事甫爾臺  
省無論政之館府寺靡聽治之所百寮居止事等行路  
沉雨炎陽自成癘疫且兵徭竝舉聖王所難今介冑之  
士外攻讐寇羸弱之夫內動土木運給之費日損千金  
驅罷敝之兵討堅城之虜將何以取勝乎陛下往冬之  
舉政欲曜武江漢示威衡湘自春幾夏理宜釋甲願橐  
旌卷旆爲持久之方崇成帝居深重本之固聖懷無內  
念之虞兆庶休斤板之役修禮華區諷風洛浦然簡英  
略之將任猛毅之雄南取荆湘據其要府則梁秦以西

覩機自服撫附振威回麾東指則義陽以左馳聲可制  
然後布仁化以綏近播恩施以懷遠凡在有情孰不思  
奮還遣慕德之人効其餘力乘流而下勢勝萬倍蕞爾  
閩甌敢不稽顙豈必茲年競斯寸尺惟願顧存近勅納  
降而旋不紆鑿輿久臨炎暑高祖從之叡表請車駕還  
代親臨太師馮熙之葬坐削奪都督三州諸軍事尋除  
都督恒朔二州諸軍事進號征北大將軍以有順遷之  
表加邑四百戶時穆泰爲定州刺史辭以疾病上溫則  
甚請恒州自効高祖許之乃以叡爲散騎常侍定州刺  
史將軍如故叡未發遂與泰等同謀構逆賜死獄中聽

免孥戮徙其妻子爲遼西郡民詔僕射李沖領軍于烈

曰陸叡元不早

關五字

大臣自與卿等同受非常之詔朕

許以不死之旨思得上下齊信以保大義朕於卿等常  
忘短棄瑕務相含養豈謂陸叡無心之甚一年於斯乃  
與穆泰結禍數圖反噬以朕遷洛內懷不可擬舉諸王  
議引子恂若斯之論前後非一始欲推故南安王次推  
陽平王若不肯從欲逼樂陵王訕謗朝廷書信炳然事  
旣垂就叡以洛都休明勸令小緩於是之後兩人復競  
然猶隱而弗聞賴陽平王忠貞奮發獲泰之言便爾馳  
表得使正人糾慝恒岳無塵是以叡之愆失處入門誅

朕諦尋前旨許不盡法反逾之志自負幽冥違誓在彼  
不關朕也反心逆意旣異餘犯雖欲矜恕末如之何然  
猶憶先言兼以末頗異議聽自死別府免厥孥戮其門  
子孫永世不齒元丕二子一弟首爲賊端其父無人明  
證理在可觀但以言無炳灼隱而弗窮以連坐應死特  
恕爲民朕本期有終而彼自棄卿等之間忽及今日違  
心乖念一何可悲故此別示想無致怪也謀反之外皎  
如白日耳沖烈表曰臣等邀逢幸會生遇昌辰才非利  
用坐班位列功無汗馬猥受山河叨忝之寵終古無比  
莫大之施萬殞靡酬而叡不識乖犬馬心同梟獍潛引

童稚構茲妖逾違悖天常罪踰萬殞叡結釁在心陰構  
不息閒說戚蕃擬窺乾象雖覩休平未懷疑惑何嘗片  
辭披露宿志原心語跡實爲賊首丕之二子從惡累年  
交扇東西規擾并夏測觀此狀無容不知雖聖慈含育  
恕其生命其若天地何其若神祇何夫効誠盡節爲下  
之常分刑茲無捨在上之常法況曲蒙莫大之恩獎以  
忠貞之義而更違天背道包藏奸逾求情推理罪乃常  
誅而慈造寬渥更流恩貸續叡三斷之骸還丕已絕之  
魄二三縱宥實虧憲典猶復上延天眷言念疇日不以  
臣等背負餘黨別垂明詔再申齊信之恩重喻皎日之

旨伏讀悲慙惟深愧惕

叡長子希道字洪度有風貌美鬚髯歷覽經史頗有文致初拜中散遷通直郎坐父事徙於遼西於後得還從征自効以軍功拜給事中遷司徒記室司空主簿征南將軍元英攻蕭衍司州以希道爲副及克義陽以功賜爵淮陽男拜諫議大夫以學關今古參議新合轉廷尉少卿加龍驤將軍南青州刺史以本將軍轉梁州刺史希道頻表辭免又除東夏州刺史不拜轉北中郎將遷前將軍郢州刺史希道善於馭邊甚有威略轉平西將軍涇州刺史正光四年卒官贈撫軍將軍定州刺史希

道有六子

士懋字元偉天平中以其曾祖麗有翼戴之勲詔特復  
鉅鹿郡開國公邑三百戶令士懋襲武定中平東將軍  
營州刺史

士懋弟士宗字仲彥尚書左外兵郎中

士宗弟士述字幼文符璽郎中士宗士述建義初竝於  
河陰遇害

士述弟士沉出繼從叔昕之

士沉弟士廉字季脩建州平北府長史永安末爲爾朱  
世隆攻陷州城見害

士廉弟士佩字季偉武定中安東將軍司州治中

希道弟希悅尚書外兵郎中驃騎諮議參軍通直散騎  
常侍平南將軍光祿大夫遇害於河陰贈散騎常侍衛  
將軍相州刺史

希悅弟希謐太尉參軍早卒

希謐弟希靜字季默司徒默曹稍遷邵郡太守

希靜弟希質字幼成起家員外郎領侍御史稍遷散騎  
侍郎陽城太守孝莊初除龍驤將軍膠州刺史蕭衍遣  
將率衆數萬從郁洲浮海據島來侵州界希質討破之  
轉建州刺史將軍如故爾朱榮之死也世隆率衆北還



晉陽希質固守拒之城陷兄子被害希質妻元氏榮妻  
之兄孫由是獲免天平初給事黃門侍郎遷魏尹轉太  
常卿衛大將軍都官尚書武定七年夏卒年五十八贈  
驃騎大將軍中書監青州刺史諡曰文希質名家子位  
宦又通不能平心於物唯與山偉宇文忠之等共爲朋  
黨排毀朝俊有識者薄之

子珣字子琰開府參軍

次瑾字子瑜性竝麤險乃爲劫盜珣瑾俱死

瑾弟瓘字子璧次悉達武定中竝儀同開府參軍

麗弟頽早卒子闕字清都性機巧歷位長水校尉賜爵

廣牧子遷龍驤將軍游擊將軍北中郎將轉南中郎將  
帶魯陽太守進號前將軍卒贈本將軍夏州刺史諡曰  
順

顏弟陵成中校尉河間太守祕書中散新城子

陵成弟龍成有父兄之風少以功臣子爲中散稍遷散  
騎常侍賜爵永安子加平遠將軍出爲安南將軍青州  
刺史假樂安公愛民恤下百姓稱之卒

子昶字細文襲爵正始中爲太尉屬加寧遠將軍以本  
官行滎陽郡事被劾會赦免久之進號廣武將軍遷司  
空司馬尋拜光祿大夫昶無他才能唯飲酒爲事出爲

平西將軍京兆內史固辭不拜轉平北將軍肆州刺史  
入爲衛將軍大鴻臚卿仍除車騎將軍左光祿大夫天  
平中進號驃騎大將軍加散騎常侍領左右兼給事黃  
門侍郎仍兼太僕卿復以本將軍爲東徐州刺史尋卒  
贈本將軍衛尉卿青州刺史

龍成季弟騏驎侍郎中散轉侍御長太和初新平太守  
銀青光祿大夫以彭城勲除夏州刺史

子高貴孝昌中兗州鎮東府法曹參軍

子操武定末度支尚書

操弟楚

高貴弟順宗員外郎秘書中散

子槩之武定末東莞太守

侯族弟宜雲中鎮將

子雋高宗世歷侍中給事顯祖初侍御長以謀誅乙渾  
拜侍中樂部尚書遷散騎常侍吏部尚書賜爵安樂公  
甚見委任尋拜尚書令後除安東將軍定州刺史轉征  
東大將軍相州刺史政尚寬惠民吏安定卒諡貞公  
子登澄城太守

子匡司空倉曹參軍

登弟子景元元象初衛將軍儀同三司南青州刺史

史臣曰陸侯威略智器有過人者馥識幹明厲不替家  
風麗忠國奉主爲時梁棟蹈忠履義制於一豎惜哉獻  
琇以沉雅顯達而覺逾陷禍深山大澤實有龍蛇希道  
風度有聲子彰令終之美也

魏書卷四十考證

陸侯傳與度世子泉婚親相好。泉北史作伯源。

臣照

按本書盧度世傳度世子淵字伯源北史避唐高祖諱書字知此則改淵爲泉唐時例以泉代淵也。

然簡英略之將任猛毅之雄南取荆湘據其要府。然字下疑脫後字。

上温則甚。

臣照

按此四字北史無之汲古閣本則闕

之蓋以義不可曉也推尋文意上字乃土字之訛時已除叡都督恒朔二州諸軍事矣因定州刺史穆泰在定疾病辭稱居定土温則疾愈甚請恒州自効蓋

恒北而定南恒必涼于定故以叡與泰對調也

魏書卷四十一

齊

魏

收

撰

列傳第二十九

源賀

源賀自署河西王禿髮傉檀之子也傉檀爲乞伏熾磐所滅賀自樂都來奔賀偉容貌善風儀世祖素聞其名及見器其機辯賜爵西平侯加龍驤將軍謂賀曰卿與朕源同因事分姓今可爲源氏從擊叛胡白龍又討吐京胡皆先登陷陳進號平西將軍世祖征涼州以賀爲鄉導詔問攻戰之計賀對曰姑臧城外有四部鮮卑各



爲之援然皆是臣祖父舊民臣願軍前宣國威信示其  
福禍必相率歸降外援旣服然後攻其孤城拔之如反  
掌耳世祖曰善於是遣賀率精騎歷諸部招慰下三萬  
餘落獲雜畜十餘萬頭及圍姑臧由是無外慮故得專  
力攻之涼州平遷征西將軍進號西平公又從征蠕蠕  
擊五城吐京胡討蓋吳諸賊皆有功拜散騎常侍從駕  
臨江爲前鋒大將賀爲人雄果每遇彊寇輒自奮擊世  
祖戒之曰兵凶戰危不宜輕犯卿可運籌處分勿恃身  
力也賀本名破羗是役也世祖曰人之立名宜其得實  
何可濫也賜名賀焉拜殿中尚書南安王余爲宗愛所

殺也賀部勒禁兵靜邊外內與南部尚書陸麗決議定策翼戴高宗令麗與劉尼馳詣苑中奉迎高宗賀守禁中爲之內應俄而麗抱高宗單騎而至賀乃開門高宗卽位社稷大安賀有力焉轉征北將軍加給事中以定策之勲進爵西平王高宗卽位班賜百僚謂賀曰朕大賚善人卿其任意取之勿謙退也賀辭固使取之賀唯取戎馬一疋而已是時斷獄多濫賀上書曰案律謀反之家其子孫雖養他族追還就戮所以絕罪人之類彰大逆之辜其爲劫賊應誅者兄弟子姪在遠道隔關津皆不坐竊惟先朝制律之意以不同謀非絕類之罪故

特垂不死之詔若年十三已下家人首惡計謀所不及  
愚以爲可原其命没入縣官高宗納之出爲征南將軍  
冀州刺史改封隴西王賀上書曰臣聞人之所寶莫寶  
於生全德之厚者莫厚於宥死然犯死之罪難以盡恕  
權其輕重有可矜恤今勅寇遊魂於北狡賊負險於南  
其在疆場猶須防戍臣愚以爲自非大逆赤手殺人之  
罪其坐贓及盜與過誤之愆應入死者皆可原命謫守  
邊境是則已斷之體更受全生之恩徭役之家漸蒙休  
息之惠刑措之化庶幾在茲虞書曰流宥五刑此其義  
也臣受恩深重無以仰荅將違闕庭豫增係戀敢上瞽

言唯加裁察高宗納之已後入死者皆恕死徙邊久之  
高宗謂羣臣曰源賀勸朕宥諸死刑徒充北番諸戍自  
爾至今一歲所活殊爲不少生濟之理旣多邊戍之兵  
有益卿等事朕致何善意也苟人人如賀朕治天下復  
何憂哉顧憶誠言利實廣矣羣臣咸曰非忠臣不能進  
此計非聖明不能納此言賀之臨州鞠獄以情徭役簡  
省武邑郡姦人石華告沙門道可與賀謀反有司以聞  
高宗謂羣臣曰賀誠心事國朕爲卿等保之無此明矣  
乃精加訊檢華果引誣於是遣使者詔賀曰卿以忠誠  
歟至著自先朝以丹青之潔而受蒼蠅之汙朕登時研

檢已加極法故遣宣意其善綬所莅勿以囂謗之言致損慮也賀上書謝書奏高宗顧謂左右曰以賀之忠誠尚致其誣不若是者可無慎乎時考殿最賀治爲第一賜衣馬器物班宣天下賀上表請代朝議以賀得民情不許在州七年乃徵拜太尉蠕蠕寇邊賀從駕追討破之顯祖將傳位于京兆王子推時賀都督諸軍屯漠南乃馳傳徵賀賀旣至乃命公卿議之賀正色固執不可卽詔賀持節奉皇帝璽綬以授高祖是歲河西勅勒叛遣賀率衆討之降二千餘落倍道兼行追賊黨郁朱于等至枹罕大破之斬首五千餘級虜男女萬餘口雜畜

三萬餘頭復追統萬高平上邽三鎮叛勅勒至于金城  
斬首三千級賀依古今兵法及先儒耆舊之說略採至  
要爲十二陳圖以上之顯祖覽而嘉焉賀以年老辭位  
詔不許又詔都督三道諸軍屯于漠南是時每歲秋冬  
遣軍三道竝出以備北寇至春中乃班師賀以勞役京  
都又非禦邊長計乃上言請募諸州鎮有武健者三萬  
人復其徭賦厚加賑恤分爲三部二鎮之間築城城置  
萬人給彊弩十二床武衛三百乘弩一床給牛六頭武  
衛一乘給牛二頭多造馬槍及諸器械使武略大將二  
人以鎮撫之冬則講武春則種殖竝戍竝耕則兵未勞

而有盈畜矣又於白道南三處立倉運近州鎮租粟以  
充之足食足兵以備不虞於宜爲便不可歲常舉衆連  
動京師令朝廷恒有北顧之慮也事寢不報又上書稱  
病篤乞骸骨至于再三乃許之朝有大議皆就詢訪又  
給衣藥珍羞太和元年二月療疾於溫湯高祖文明太  
后遣使者屢問消息太醫視疾患篤還京師賀乃遣令  
勅諸子曰吾頃以老患辭事不悟天慈降恩爵逮於汝  
汝其母傲吝母荒怠母奢越母嫉妬疑思問言思審行  
思恭服思度遏惡揚善親賢遠佞目觀必真耳屬必正  
誠勤以事君清約以行已吾終之後所葬時服單積足

申孝心芻靈明器一無用也三年秋薨年七十三贈侍中太尉隴西王印綬諡曰宣賻雜綵五百疋賜輜輶車及命服溫明祕器陪葬于金陵

長子延性謹厚好學初以功臣子拜侍御中散賜爵武城子西治都將卒贈涼州刺史廣武侯諡曰簡

子鱗襲

延弟思禮後賜名懷謙恭寬雅有大度高宗末爲侍御中散父賀辭老詔懷受父爵拜征南將軍尋爲持節督諸軍屯於漠南還除殿中尚書出爲長安鎮將雍州刺史清儉有惠政善於撫恤劫盜息止流民皆相率來還



歲餘復拜殿中尚書加侍中參都曹事又督諸軍征蠕  
蠕六道大將啓受節度遷尚書令參議律令後例降爲  
公除司州刺史從駕南征加衛大將軍領中軍事以母  
憂去職賜帛三百疋穀千石十九年除征北大將軍夏  
州刺史轉都督雍岐東秦諸軍事征西大將軍雍州刺  
史景明二年徵爲尚書左僕射加特進時有詔以奸吏  
犯罪每多逃遁因旨乃出竝皆釋然自今已後犯罪不  
問輕重而藏竄者悉遠流若永避不出兄弟代徙懷乃  
奏曰謹按條制逃吏不在赦限竊惟聖朝之恩事異前  
宥諸流徙在路尚蒙旋反況有未發而仍遣邊戍按守

宰犯罪逃走者衆祿潤旣優尚有茲失及蒙恩宥卒然得還今獨苦此等恐非均一之法如臣管執謂宜免之書奏門下以成式旣班駁奏不許懷重奏曰臣以爲法貴經通治尚簡要刑憲之設所以網羅罪人苟理之所備不在繁典行之可通豈容峻制此乃古今之達政救世之恒規伏尋條制勲品已下罪發逃亡遇恩不宥仍流妻子雖欲抑絕奸途匪爲通式謹按事條侵官敗法專據流外豈九品已上人皆貞白也其諸州守宰職任清流至有貪濁事發逃竄而遇恩免罪勲品已下獨乖斯例如此則寬縱上流法切下吏育物有差惠罰不等

又謀逆滔天輕恩尚免吏犯微罪獨不蒙赦使大宥之  
經不通開生之路致壅進違古典退乖今律輒率愚見  
以爲宜停書奏世宗納之其年除車騎大將軍涼州大  
中正懷奏曰南賊遊魂江揚職爲亂逆肆厥淫昏月滋  
日甚貴臣重將靡有子遺崇信姦回毗比閹豎內外離  
心骨肉猜叛蕭寶融僭號於荆郢其雍州刺史蕭衍勒  
兵而東襲上流之衆已逼其郊廣陵京口各持兵而懷  
兩望鍾離淮陰竝鼎峙而觀得失秣陵孤危制不出門  
君子小人竝罹災禍延首北望朝不及夕斯實天啓之  
期吞并之會乘厥蕭牆之釁籍其分崩之隙東據歷陽

兼指瓜步緣江鎮戍達於荆郢然後奮雷電之威布山河之信則江西之地不刃自來吳會之鄉指期可舉昔士治有言皓若暴死更立賢主文武之官各得其任則勅敵也若蕭衍克就上下同心非直後圖之難實亦揚境危逼何則壽春之去建鄴七百而已山川水陸彼所諳利脫江湘無波君臣效職藉水憑舟倏忽而至壽春容不自保江南將若之何今寶卷邑居有土崩之形邊城無繼援之兆清蕩江區寔在今日臣受恩旣重不敢不言詔曰不君不臣江南常弊有粟不食其在斯矣上天將欲亡之諸蕃又願取之人事天道孰云匪會但以

養害仁者不爲且十月五日行軍已達大航其大傷小  
亡之勢久應有決假令天罰寶卷行兵獲進則行之主  
佐又是亂亡遺孽皇靈其能久祐之乎今之所矜者正  
以南黔企德邊書繼至殄悴之氓理須救接若爾者揚  
州兵力配積不少但可速遣任城委以處分別加慰勉  
令妙盡邊算也以行事克遂停懷又表曰昔世祖昇遐  
南安在位出拜東廟爲賊臣宗愛所弑時高宗避難龍  
潛苑中宗愛異圖神位未定臣亡父先臣賀與長孫渴  
侯陸麗等表迎高宗纂徽寶命麗以扶負聖躬親所見  
識蒙授撫軍大將軍司徒公平原王興安二年追論定

策之勳進先臣爵西平王皇興季年顯祖將傳大位於京兆王先臣時都督諸將屯於武川被徵詣京特見顧問先臣固執不可顯祖久乃許之遂命先臣持節授皇帝璽綬於高祖至太和十六年麗息叡狀私書稱其亡父與先臣援立高宗朝廷追錄封叡鉅鹿郡開國公臣時丁艱草土不容及例至二十年除臣雍州刺史臨發奉辭面奏先帝申先臣舊勳時勅旨但赴所臨尋當別判至二十一年車駕幸雍臣復陳聞時蒙勅旨征還當授自宮車晏駕遂爾不白竊惟先臣遠則援立高宗寶歷不墜近則陳力顯祖神器有歸如斯之勳超世之事

麗以父功而獲河山之賞臣有家勳不霑茅社之賜得  
否相懸請垂裁處詔曰宿老元臣云如所訴訪之史官  
頗亦言此可依比授馮翊郡開國公邑九百戶又詔爲  
使持節加侍中行臺巡行北邊六鎮恒燕朔三州賑給  
貧乏兼採風俗考論殿最事之得失皆先決後聞自京  
師遷洛邊朔遙遠加連年旱儉百姓困敝懷銜命巡撫  
存恤有方便宜運轉有無通濟時后父于勁勢傾朝野  
勁兄于祚與懷宿昔通婚時爲沃野鎮將頗有受納懷  
將入鎮祚郊迎道左懷不與語卽劾祚免官懷朔鎮將  
元尼須與懷少舊亦貪穢狼籍置酒請懷謂懷曰命之

長短由卿之口豈可不相寬貸懷曰今日之集乃是源  
懷與故人飲酒之坐非鞫獄之所也明日公庭始爲使  
人檢鎮將罪狀之處尼須揮淚而已無以對之懷旣而  
表劾尼須其奉公不撓皆此類也懷又表曰景明以來  
北蕃連年災旱高原陸野不任營殖唯有水田少可蓄  
畝然主將參僚專擅腴美瘠土荒疇給百姓因此困敝  
日月滋甚諸鎮水田請依地令分給細民先貧後富若  
分付不平令一人怨訟者鎮將已下連署之官各奪一  
時之祿四人已上奪祿一周北鎮邊蕃事異諸夏往日  
置官全不差別沃野一鎮自將已下八百餘人黎庶怨



嗟僉曰煩猥邊隅事鈔實少畿服請主帥吏佐五分減  
二詔曰省表具恤民之懷已勅有司一依所上下爲永  
準如斯之比不便於民損化害政者其備列以聞時細  
民爲豪彊陵壓積年枉滯一朝見申者日有百數所上  
事宜便於北邊者凡四十餘條皆見嘉納正始元年九  
月有告蠕蠕率十二萬騎六道竝進欲直趨沃野懷朔  
南寇恒代詔懷以本官加使持節侍中出據北蕃指授  
規略隨須徵發諸所處分皆以便宜從事又詔懷子直  
寢徽隨懷北行詔賜馬一匹細鎧一具御稍一枚懷拜  
受訖乃於其庭跨鞍執稍躍馬大呼顧謂賓客曰氣力

雖衰尚得如此蠕蠕雖畏壯輕老我亦未便可欺今奉  
廟勝之規總驍捍之衆足以擒其酋帥獻俘闕下耳時  
年六十一懷至雲中蠕蠕亡遁懷旋至恒代案視諸鎮  
左右要害之地可以築城置戍之處皆量其高下揣其  
厚薄及儲糧積仗之宜犬牙相救之勢凡表五十八條  
表曰蠕蠕不羈自古而爾遊魂鳥集水草爲家中國患  
者皆斯類耳歷代驅逐莫之能制雖北拓榆中遠臨瀚  
海而智臣勇將力算俱竭胡人頗遁中國以疲于時賢  
哲思造化之至理推生民之習業量夫中夏粒食邑居  
之民蠶衣儒步之士荒表茹毛飲血之類鳥宿禽居之

徒親校短長因宜防制知城郭之固暫勞永逸自皇魏  
統極都於平城威震天下德籠宇宙今定鼎成周去北  
遙遠代表諸蕃北固高車外叛尋遭旱儉戎馬甲兵十  
分闕八去歲復鎮陰山庶事蕩盡遣尚書郎中韓貞宋  
世量等檢行要險防邊形便謂準舊鎮東西相望令形  
勢相接築城置戍分兵要害觀農積粟警急之日隨便  
翦討如此則威形增廣兵勢亦盛且北方沙漠夏乏水  
草時有小泉不濟大衆脫有非意要待秋冬因雲而動  
若至冬日冰沙凝厲遊騎之寇終不敢攻城亦不敢越  
城南出如此北方無憂矣世宗從之今北鎮諸戍東西

九城是也遷驃騎大將軍時武興氏王楊紹先叔集起反叛詔懷使持節侍中都督平氏諸軍事以討之須有興廢任從權計其邢巒李煥竝稟節度三年六月卒年六十三詔給東園祕器朝服一具衣一襲錢二十萬布七百疋蠟三百斤贈司徒冀州刺史兼吏部尚書盧昶奏太常寺議諡曰懷體尚寬柔器操平正依諡法柔直考終曰靖宜諡靖公司徒府議懷作牧陝西民餘惠化入總端貳朝列歸仁依諡法布德執義曰穆宜諡穆公二諡不同詔曰府寺所執竝不克允愛民好與曰惠可諡惠公懷性寬容簡約不好煩碎恒語人曰爲貴人理

世務當舉綱維何必須太子細也譬如爲屋但外望高顯楹棟平正基壁完牢風雨不入足矣斧斤不平斲削不密非屋之病也又性不飲酒而喜以飲人好接賓友雅善音律雖在白首至宴居之暇常自操絲竹懷有七子

長子規字靈度中書學生羽林監襲爵年三十三卒  
子肅襲卒

子紹襲景明初詔復王爵尋除隴西郡開國公卒於光祿大夫贈度支尚書冀州刺史諡曰文

子文遠襲齊受禪例降

規弟榮字靈竝年三十二卒於司徒掾贈光州刺史

榮弟徽字靈祚年二十八卒於直閣將軍特贈洛州刺

史諡曰質

徽弟玄諒出後懷弟奐卒贈代郡太守

玄諒弟子雍字靈和少好文雅篤志於學推誠待士士多歸之自祕書郎除太子舍人涼州中正肅宗踐阼以宮臣例轉奉車都尉遷司徒屬轉太中大夫司徒司馬除恒農太守遷夏州刺史時沃野鎮人破落汗拔陵首爲反亂所在蜂起統萬逆胡與相應接子雍嬰城自守城中糧盡煮馬皮而食之子雍善綏撫得士心人人戮

力無有離貳以饑饉轉切欲自出求糧留子延伯據守  
寮屬僉云今天下分析寇賊萬重四方音信莫不斷絕  
俄頃之間變在不意何宜父子如此分張未若棄城俱  
去更展規略子雍泣而謂衆曰吾世荷國恩早受藩寄  
此是吾死地更欲何求然守禦以來歲月不淺所患乏  
糧不得制勝吾今向東州得數月之食還與諸人保全  
必矣遂自率羸弱向東夏運糧延伯與將士送出城外  
哭而拜辭三軍莫不嗚咽子雍行數日爲朔方胡帥曹  
阿各拔所邀力屈見執子雍乃密遣人齎書問行與城  
中文武云大軍在近努力圍守必令諸人福流苗裔又

勅延伯令共固守子雍雖被囚執雅爲胡人所敬常以民禮事之子雍爲陳安危禍福之理勸阿各拔令降阿各拔將從之未果而死拔弟桑生代總部衆竟隨子雍降時北海王顥爲大行臺子雍具陳賊可滅之狀顥給子雍兵馬令其先行時東夏合境反叛所在屯結子雍轉鬪而前九旬之中凡數十戰仍平東夏徵稅租粟運於統萬於是二夏漸寧及蕭寶夤等爲賊所敗賊帥宿勤明達遣息阿非率衆邀路華州白水被圍逼關右騷擾咫尺不通時子雍新平黑城遂率士馬并夏州募義之民攜家席卷鼓行南出賊帥康維摩擁率羗胡守鋸



谷斷甃棠橋子雍與交戰大破之生禽維摩又攻賊帥契官斤於楊氏堡破之子雍出自西夏漸至於東轉戰千里至是朝廷始得其委問除散騎常侍使持節假撫軍將軍都督兼行臺尚書復破賊帥紇單步胡提於曲沃堡肅宗璽書勞勉之子雍在白水郡復破阿非軍多所斬獲詔遣侍中尚書令城陽王徽於潼關宣旨慰勞除中軍將軍金紫光祿大夫給事黃門侍郎封樂平縣開國公邑一千戶還洛以葛榮久逼信都詔假子雍征北將軍爲北討都督時相州刺史安樂王鑒據鄴反勅子雍與都督李神軌先討之子雍行達湯陰鑒遣弟斌

之夜襲子雍軍不克奔敗而返子雍乘機繼進徑圍鄴城與裴衍神軌等攻鑿平之改封陽平縣開國公增邑千五百戶進號鎮東將軍遂與裴衍發鄴以討葛榮而信都城陷除子雍冀州刺史餘官如故子雍以冀州不守上書曰賊中甚飢專仰野掠今朝廷足食兵卒飽暖高壁深壘勿與爭鋒彼求戰則不得野掠無所獲不盈數旬可坐制凶醜時裴衍復表求行詔子雍與衍速進子雍重表固請如謂不可乞令裴衍獨行若不賜解求停裴衍苟逼固行取敗旦夕詔不聽遂與衍俱進至陽平郡東北漳曲榮率賊十萬來逼官軍子雍戰敗被害

年四十朝野痛惜之贈車騎大將軍儀同三司雍州刺史公如故永安中重贈司空諡曰莊穆

長子延伯出後從伯

次子士則早亡

士則弟士正士規竝坐事死

次楷字士質小字那延襲武定中齊文襄王府參軍齊受禪例降

延伯初爲司空參軍事時南秦民吳富反叛詔以河間王琛爲都督延伯叔父子恭爲軍司延伯爲統軍隨子恭西討戰必先鋒子恭見其年幼常訶制之而不能禁

子雍在夏州表乞兵援詔延伯率羽林一千人赴之城  
鬪野戰勇冠三軍子雍之向東夏留延伯城守付以後  
事延伯與兵士共分湯萊防固城隍及子雍爲胡所執  
合城憂懼延伯乃人人曉諭曰吾父吉凶不測方寸焦  
爛實難裁割但奉命守城所爲處重若以私害公誠孝  
竝闕諸君幸得此心無虧所寄於是衆感其義莫不勵  
憤朝廷聞而嘉之除龍驤將軍行夏州事封五城縣開  
國子食邑三百戶卒能固守及後刺史至延伯率領義  
衆還赴子雍共平黑城在甌棠橋戰先鋒陷陳身擒維  
摩及至白水首摧阿非隨子雍至都進爵浮陽伯增封

百戶爲諫議大夫假冠軍將軍別將隨子雍北討與葛榮戰歿時年二十四贈持節平北將軍涼州刺史開國如故

子孝孫襲齊受禪爵例降

子雍弟子恭字靈順聰慧好學初辟司空參軍事司徒祭酒尚書北主客郎中攝南主客事蕭衍亡人許周自稱爲衍給事黃門侍郎朝士翕然咸共信待子恭奏曰徐州表投化人許團并其弟周等究其牒狀周列云己蕭衍黃門侍郎又稱心存山水不好榮宦屢曾辭讓貽彼赫怒遂被出爲齊康郡因爾歸國願畢志嵩嶺比加

採訪略無證明尋其表狀又復莫落案牒推理實有所  
疑何者昔夷齊獨往周王不屈其志伯況辭祿漢帝因  
成其美斯實古先喆王必有不臣之人者也蕭衍雖復  
崎嶇江左竊號一隅至於處物未甚悖禮豈有士辭榮  
祿而苟不聽之哉推察情理此則孟浪假蕭衍皆狂不  
存雅道逼士出郡未爲死急何宜輕去生養之士長辭  
父母之邦乎若言不好榮官志願嵩嶺者初屈之日卽  
應杖策尋山負帙泝水而乃廣尋知己遍造執事希榮  
之心已見逃宦之志安在昔梁鴻去鄉終傭吳會逢萌  
浮海遠客遼東竝全志養性逍遙而已考之事實何其

懸哉又其履歷清華名位高達計其家累應在不輕今者歸化何其孤迥設使當時忽遽不得攜將及其來後家貲產業應見簿歛尊卑口累亦當從法而周兄弟怡然嘗無憂戚若無種族理或可通如有不坐便應是衍故遣非周投化推究二三真僞難辨請下徐揚二州密訪必令獲實不盈數旬玉石可覩於是詔推訪周果以罪歸闕假稱職位如子恭所疑河州羌却鐵忽反殺害長吏詔子恭持節爲行臺率諸將討之子恭嚴勒州郡及諸軍不得犯民一物輕與賊戰然後示以威恩兩旬間悉皆降欵朝廷嘉之正光元年爲行臺左丞巡行北

邊轉爲起部郎明堂辟雍竝未建就子恭上書曰臣聞  
辟臺望氣軌物之德旣高方堂布政範世之道斯遠是  
以書契之重理冠於造化推尊之美事絕於生民至如  
郊天饗帝蓋以對越上靈宗祀配天是用酬膺下土大  
孝莫之能加嚴父以茲爲大乃皇王之休業有國之盛  
典竊惟皇魏居震統極總宙馭宇革制土中垂式無外  
自北徂南同卜維於洛食定鼎遷民均氣候於寒暑高  
祖所以始基世宗於是恢構按功成作樂治定制禮乃  
訪遺文修廢典建明堂立學校興一代之茂矩標千載  
之英規永平之中始創雉構基趾草昧迄無成功故尚



書令任城王臣澄按故司空臣沖所造明堂樣并連表  
詔荅兩京模式奏求營起緣期發旨卽加葺繕侍中領  
軍臣又物動作官宣贊授令自茲厥後方配兵人或給  
一千或與數百進退節縮曾無定準欲望速了理在難  
克若使專役此功長得營造委成責辦容有就期但所  
給之夫本自寡少諸處競借動卽干計雖有繕作之名  
終無就功之實爽塏荒茫淹積年載結架崇構指就無  
兆仍令肄冑之禮掩仰而不進養老之儀寂寥而不返  
構厦止於尺土爲山頓於一簣良可惜歟愚謂召民經  
始必有子來之歌興造勿亟將致不日之美況本兵不

多兼之牽役廢此與彼循環無極便是輟創禮之重資  
不急之費廢經國之功供寺館之役求之遠圖不亦闕  
矣今諸寺大作稍以粗舉竝可徹減專事經綜嚴勒工  
匠務令克成使祖宗有薦配之期蒼生覩禮樂之富書  
奏從之除冠軍將軍中散大夫又領治書侍御史秦益  
氏反詔子恭持節爲都督河間王琛軍司以討之事平  
仍行南秦州事及六鎮反以子恭兼給事黃門郎持節  
慰勞還拜河內太守加後將軍平絳蜀反丹谷清廉二  
路險澁不通以子恭爲當闕郡別將俄而建興蜀復反  
相與連勢進子恭爲持節散騎常侍假平北將軍征建

興都督仍兼尚書行臺與正平都督長孫稚合勢進討  
大破之正平賊帥范明遠與賊帥劉牙奴竝面縛請降  
事平除平南將軍豫州刺史尋加散騎常侍撫軍將軍  
武泰初郢州刺史元願達以城降蕭衍詔徵都督尉慶  
賓還京師回衆隸子恭以討之衍將夏侯夔率衆數萬  
來寇遠近不安夔乘勢分兵遂逼新蔡自攻毛城子恭  
隨方應援賊竝破走蕭衍豫州刺史夏侯亶復遣四將  
率衆三萬人圍南頓北攻陳項子恭遣軍禦之賊復奔  
退加鎮南將軍又兼尚書行臺子恭勒衆渡淮徙民於  
淮北立郡縣置戍而還蕭衍直閣將軍軍主胡智達等

八將與其監軍閻次洪入寇屯於州城東北四十餘里  
子恭擊破之斬智達生擒次洪元顥之入洛也加子恭  
車騎將軍子恭不敢拒之而頻遣間使參莊帝動靜未  
幾顥敗車駕還洛進征南將軍兼右僕射假車騎將軍  
後加散騎常侍板橋蠻文石活石忌麤受蕭衍印節扇  
誘黨類據險寇竊子恭躬率將士徑襲其柵數日之中  
殲瘞略盡諸蠻欵服咸求輸稅徵拜右光祿大夫給事  
黃門侍郎仍本將軍錄其前後征討功封臨潁縣開國  
侯食邑六百戶加散騎常侍俄遷侍中爾朱榮之死也  
世隆度律據斷河橋詔子恭爲都督以討之出頓於大

夏門北尋而太府卿李苗夜燒河橋世隆退走仍以子恭兼尚書僕射爲大行臺大都督尋遷衛將軍假車騎將軍率諸將於太行築壘以防之旣而爾朱兆率衆南出子恭所部都督史仵龍羊文義開柵降兆子恭退走爲兆所破衆旣退散兆因入洛子恭竄于緱氏仍被執送俄而見釋前廢帝初除驃騎將軍左光祿大夫侍中如故尋授散騎侍郎都督三州諸軍事本將軍假車騎大將軍行臺僕射荊州刺史以與定策之勳封臨汝縣開國子食邑三百戶時叛蠻雷亂清受蕭衍兗州刺史章綬入爲寇掠諸蠻從之置立郡縣子恭討平之永熙

中入爲吏部尚書加驃騎大將軍以子恭前在豫州戰功追賞襄城縣開國男食邑二百戶又論子恭餘効封新城縣開國子食邑四百戶子恭尋表請轉授第五子文盛許之天平初除中書監三年拜魏尹又爲齊獻武王軍司元象元年興和二年贈都督徐兗二州諸軍事驃騎大將軍尚書左僕射司空公兗州刺史諡曰文獻子彪字文宗子恭存日轉授臨潁縣開國侯武定末太子洗馬

彪弟文瑤武定中襲襄城縣開國男齊受禪爵竝降子恭弟纂字靈秀員外散騎侍郎累遷征虜將軍通直

散騎常侍涼州大中正轉大府少卿建義初遇害河陰  
年三十七贈散騎常侍征北將軍定州刺史

懷弟奐字思周少而謹密初爲中書學生隨父討勅勒  
有斬獲之功遷中散前後使檢察州鎮十餘所皆有功  
績除長樂太守以母老解官歸養卒無子

史臣曰源賀堂堂非徒武節而已其翼戴高宗庭抑禪  
讓殆社稷之臣也懷幹略兼舉出內有聲繼迹賢考不  
墜先業子雍効立夏方身亡冀野惜乎

魏書卷四十一考證

源賀傳時年二十四。二監本誤三

臣人龍

按本傳云

子雍戰敗被害年四十今延伯隨父北討與葛榮戰同時戰歿安有父年四十而子已三十四耶今依別本改

掩仰而不進。仰字疑抑字之訛

元象元年興和二年贈都督徐兗二州諸軍事。臣人

龍

按孝靜帝紀卽位之五年改元元象其明年又改

元興和元象元年句下當脫一卒字蓋子恭卒於元象元年至興和二年乃卹贈也